

रोमय् च्वंगु मण्डलीयात पावलं च्वःगु पौ म्हसीका

रोमय् च्वंगु मण्डलीयापि विश्वासीतयत् नापलायेगु मनं तुनाः पावलं थ्व पौ च्वःगु खः। अन वनाः छुं ई अन च्वंपि विश्वासीतनाप ज्या यानाः इमिगु ग्वाहालि कयाः अनं स्पेन वनेगु पावलया ग्वासाः खः। पावलं थःम्हं थू थें ख्रीष्टियनतयगु विश्वास व थ्वयात व्यवहारय् छ्यलेमाःगु खँ च्वयातःगु दु। थ्व सफुलिइ पावलं थःगु खँयात पूर्वक न्ह्यथनातःगु दु।

रोमय् च्वंगु मण्डलीइ च्वंपिन्त ज्वजलपा याये धुंकाः पावलं थ्व पतिइ थःम्हं इमिगु निंति प्रार्थना यानाच्चवनागु खँ न्ह्यथनाः “भिगु खं मनूतयत् गुकथं उद्धार याइ व विश्वासं जक मनूत धर्मी ठहरय् जुइ फइ” धकाः न्ह्यथनातःगु दु।

यहदी व यहदीमखुपि फुक्कं पापय् लानाच्चंगुलि फुक्कसिनं परमेश्वरया न्ह्यःने धर्मी ठहरय् जुइत स्वयेमाः। येशू ख्रीष्टयात विश्वास यानाः हे जक परमेश्वरया न्ह्यःने धर्मी ठहरय् जुइ। अले न्ह्यगु जीवन कयाः ख्रीष्टनाप छुपें जुयाः परमेश्वरलिसे न्ह्यगु स्वापु तयेखनी। विश्वासीतयके परमेश्वरयागु शान्ति दइ, अले पवित्र आत्मायागु शक्ति पाप व मृत्युयागु पन्जां छुतय् जुइ। अध्याय ५ निसें ८ तक पावलं परमेश्वरयागु व्यवस्था छाया माल धयागु व विश्वासीतयके पवित्र आत्मायागु शक्ति दइ धयागु खँ न्ह्यथनातःगु दु।

९ अध्याय निसें ११ अध्याय तक यहदी व यहदीमखुपि मनूतयगु बारे परमेश्वरयागु गज्याःगु ग्वासाः दु धयागु खँ क्यनातःगु दु। यहदीतयसं येशूयात मुक्ति बीम्ह ख्रीष्ट खः धकाः विश्वास मयाःगु नं परमेश्वरयागु हे ग्वासाः खः। यहदीमखुपिन्सं येशूयात विश्वास यानाः वय्कःयागु दया माया काये खनेमा धकाः वय्कलं थथे यानादीगु खः। अले यहदीतयसं येशूयात सदां विश्वास मयासैं च्वनी मखु धकाः पावलं पुलांगु नियमयात कयाः क्यनातःगु दु।

१२ अध्याय निसें १५ तक पावलं विश्वासीतयसं गथे यानाः जुइमाः धयागु खँ न्ह्यथनातःगु दु। थःथवय् माया यानाः गुकथं मिलय् जुयाच्चवेनामाः धकाः नं पावलं बःबियाः च्वयातःगु दु। परमेश्वरयात गुकथं सेवा यायेगु, सरकारं धाःथें च्वनेगु, छम्हय्सिनं याःगु ज्याखँय् मेम्हय्सित दोष मबीगु व सुयागु विश्वासय् पंगलः

मवय्केगु खँ नं पावलं ध्वाथुइक कनातःगु दु। दकलय् लिपा पावलं थःगुपाखें अन च्वनाच्वंपि सकसितं ज्वजलपा यानाः व परमेश्वरयात तःधंकाः थ्व पौ क्वचाय्कातःगु दु।

धलः पौ

न्ह्यखँ व मू खँ १:१-१७

मनूतय्त मुक्ति माःगु खँ १:१८-३:२०

गुकथं परमेश्वरं मुक्ति बियादी ३:२१-४:२५

ख्रीष्टयात विश्वास यानाः दइगु न्हगु जीवन ५:१-८:३९

इस्राएलया बारे परमेश्वरया ग्वसाः ९:१-११:३६

विश्वासीतयगु चालचलन १२:१-१५:१३

क्वचाय्कूगु व ज्वजलपा याना छ्वःगु १५:१४-१६:२७

रोमी

पावलपाखें ज्वजलपा

1 येशू ख्रीष्टया दास जि पावलयात परमेश्वरयागु भिंगु खँ न्यकेत वय्कलं हे प्रेरित दय्कादिल।

2 थ्व हे भिंगु खँ न्हापांनिसें हे परमेश्वरं वय्कःया अगमवक्तातय्त धर्मशास्त्रय् च्वकाः थथे यानादी धकाः धयादीगु खः।

3 थ्व भिंगु खँ वय्कःया काय् झी प्रभु येशू ख्रीष्टया बारे खः। वय्कःया काय् दाऊदया सन्तानपाखें मनू जुयाः झायादिल।

4 अले पवित्र आत्मायागु शक्तिं वय्कः म्वाना तुं वयाः परमेश्वरया काय् खः धकाः क्यनादिल।

5 वय्कःयागु नां दक्व जात जातिया मनूतय्त न्यंकाः विश्वास याःपिन्सं वय्कःयात मानय् यायेमाः धकाः धया बीत वय्कलं हे जिमित दया माया यानाः प्रेरित दय्कादिल।

6 वय्कःया मनूत यायेत छिपि रोमय् च्वंपिन्त नं येशू ख्रीष्टं सःतादीगु दु।

7 परमेश्वरं सःताः पवित्र यानातःपि रोमय् च्वंपि परमेश्वरया यःपि फुक्कसित छिमित झी परमेश्वर बाः व प्रभु येशू ख्रीष्टया दया माया व शान्ति दयेमा।

पावलं रोमय् वनेगु मन याःगु

8 दकलय् न्हापां जिं परमेश्वरयात येश् ख्रीष्टपाखें छिपिं फुक्कसिगु निंति सुभाय् बी, छायाधाःसा सारा संसार न्यंक छिमिसं यानाच्चंगु विश्वासयागु खँ बयबय् जुयाच्चंगु दु।

9 जिं प्रार्थना यायेबलय् छिमित गुबलें हे नं ल्वःमंकागु मदु धकाः जिं मानय् यानाच्चनाम्ह परमेश्वरं स्यू। वय्कःया काय्यागु भिंगु खँ न्यंकाः जिं दुनुगलानिसें वय्कःया सेवा यानाच्चनागु दु।

10 जि छिमिथाय् वये फयेमा धकाः न्हियान्हिथं प्रार्थना यानाच्चनागु दु। वय्कलं जितः छवया हयादीसा छन्हू ला जि छिमिथाय् वये।

11 पवित्र आत्मां बियादीगु वरदान बियाः छिमिगु विश्वास बल्लाकेत छिमिथाय् वये मास्ति वः।

12 थथे झीनाप च्वनेबलय् जिं छिमित जक मखु, छिमिसं नं जितः आत्माय् बल्लाके फइ धयागु जिगु इच्छा दु।

13 यःपिं दाजुकिजापिं, जि छिमिथाय् वयेत तःकः मछि हे कुतः याये धुन। छुं खं यानाः वये मफया च्वन। जि वयाः मेथाय् च्वंपिं यहदीमखुपिन्त थें छिमिथाय् नं परमेश्वरयात म्हमस्यूपिं मनूतय्त वय्कःयात म्हसीका बी।☆

14 ग्रीकतय्त व ग्रीक मखुपिन्त नं अले ब्वनातःपिन्त व ब्वनामतःपिन्त भिंगु खँ जिं मकंसे मगाःगु दु।

15 अयजूगुलि छिपिं रोमय् च्वंपिन्त नं भिंगु खँ न्यंके मास्ति वःगु खः।

भिंगु खँ हे शक्ति खः

16 थथे जूगुलिं भिंगु खँ न्यंकेत जि मछाः मजू। छायाधाःसा विश्वास याइपिं फुक्कसितं, न्हापालाक यहदीतय्त अले यहदीमखुपिन्त नं उद्धार बीत थ्व भिंगु खँ परमेश्वरयागु शक्ति खः।☆

17 थ्व भिंगु खँ परमेश्वरं मनूतय्त गुकथं उद्धार यानादी धकाः क्यनी। विश्वासं हे जक मनूत धर्मी ठहरय् जुइ। धर्मशास्त्रय् नं थथे च्वयातःगु दु –
“धर्मीत विश्वासं हे म्वाइ।”☆

मनूतय्तु पाप व परमेश्वरयागु तं

18 मभिंगु बांमलाःगु ज्याखँ जक यानाः सत्ययात त्वपुया छवयेत स्वइपिं मनूत खनाः स्वर्गय् च्वंम्ह परमेश्वर तंम्बय्कादीगु दु धकाः फुक्क मनूतय्त सीकादिला।

19 परमेश्वर धाःम्ह सु खः, गज्याःम्ह खः धकाः इमिसं अःपुक हे सीके फु, छायाधाःसा वय्कलं हे इमित थज्याःगु ज्याखँ क्यनादीगु दु।

20 सृष्टिनिसैं परमेश्वरयागु खने मदुगु स्वभाव, वय्कःयाके सदां दयाच्चनीगु शक्ति, व दयेमाःगु गुण, वय्कःयागु सृष्टि बांलाक हे सी दु। अय्जगुलि इमिसं त्वहः तयेथाय् मदु।

21 इमिसं परमेश्वरयात म्हस्यूसां वय्कःयात मानय् मयाः। अले वय्कःयात तःधके मालं नं तःमधकू। थुकथं इपि थःगु बिचारं यानाः ज्यालगय् मजूपि जुल व इमिगु बुद्धि मदुगु नुगः खिउंसे च्वन।☆

22 सःस्युपि बुद्धिमान खः धकाः धाधां हे इपि छुं मस्युपि मूर्ख जुयाः वन।

23 अले इमिसं सदां म्वाना च्वनीम्ह परमेश्वरयात मानय् याये मालं झन नाश जुयावनीपि मनू, झंगः, पशुत व घिसय् जुया जुइपि जन्तुतय्गु मूर्तियात पुजा यात।☆

24 इमिसं थथे याना जूगुलि परमेश्वरं इमित बांमलाःगु मभिगु जक याना जुइगुलिइ हे त्वःतादिल, ताकि इमिसं थःम्हं थःगु म्हायात क्वह्यंकेमा।

25 परमेश्वरयागु सत्ययात इमिसं मखुगु खँनापं हिलाः सृष्टि यानादीम्ह परमेश्वरयात मानय् मयासैं वय्कलं सृष्टि यानातःपिन्त पुजा व सेवा यानाच्चन। परमेश्वर न्हाबलैं तःधनेमा। आमेन।

26 इमिसं थथे याना जूगुलि परमेश्वरं इमित मभिगु बांमलाःगु हे जक याना जुइत त्वःतादिल। उकिं इमि मिसातय्सं थः भाःतपि नाप घनेगु त्वःताः मिसात नाप हे व्यभिचार याना जुल।

27 अथे हे मिजंत नं मिसात नाप घनेगु त्वःताः मिजं मिजंत हे व्यभिचार याना जुल। थुकथं मिजंतय्सं मिजंतनाप लज्या चायापुगु ज्याखँ याना जूगुलि इमित पाय्छिगु सजाँय बियादिल।

28 थज्याःपिन्सं परमेश्वरयात क्वह्यंकेगुलि वय्कलं नं इमित दकलय् क्वह्यंकेगु मन व मभिगु बांमलाःगु बिचालय् हे त्वःतादिल।

29 थज्याःपि मनूतय्गु नुगः थज्याःगुलिइ जक जायाच्चनी – पापी ज्या, मभिगु ज्या, लोभ, मभिगु इच्छा, नुगः मुइकेगु, मनू स्यायेगु, ल्वापु यायेगु, थगय् यायेगु, हेय्काः कायेगु व कर्पिन्त क्वह्यंकेगु,

30 ख्वाः ल्युने कर्पिन्त मभिकाः खँ ल्हाः जुइगु, परमेश्वरयात हेला यायेगु, तःधंछुयाः कर्पिन्त हेला यानाः खँ ल्हायेगु, घमण्डी जुइगु, जि हे खः तःधंम्ह धकाः जुइगु, मभिंगु बांमलाःगु जक ज्याखँ यानाजुइगु व मां बौयात मानय् मयायेगु।

31 बुद्धि मदुपिं, पत्याः याये बहःमजूपिं, दया माया याये मसःपिं,

32 थज्याःगु ज्याखँ यानाजुइपिं मनूतय्त परमेश्वरं नरकय् छ्वयादी धकाः वय्कःयागु आज्ञा सीक सीकं हे इमिसं थज्याःगु ज्याखँ जक याना जूगु मखु, थथे मभिंगु ज्याखँ यानाजुइपिनापं छगू हे मन जुयाजुल।

2

परमेश्वरयागु इन्साफ

1 कर्पिनिगु निन्दा जक याइपिं छिमिसं छुं हे त्वहः तयथाय् मदु, छायाधाःसा गुगु दोष छिमिसं मेपिन्त बी, व हे दोष छिमिके नं दु, छायाधाःसा छिमिसं नं व हे ज्या यानाच्चंगु दु।*

2 थुकथं ज्याखँ यानाजुइपिं मनूतय्त परमेश्वरं दोषी यानादी धकाः झीसं स्यु।

3 अय् मनूत, छिमिसं थुकथं ज्याखँ यानाजुइपिन्त दोष बियाजुइगु? छिमिसं नं इमिसं थें याना जुल धाःसा परमेश्वरं न्याय यानादीबलय् छिमित त्वःतादी धकाः बिचाः यानाच्चनागु ला?

4 परमेश्वरया दया मायां छिमिसं पश्चाताप याकी धकाः थुइके मफया, छु छिमिसं वय्कःया दया, सह यायेगु शक्ति व पिया च्वनादी फुम्हय्सित हे हेपय याये ज्यु ला?

5 छिमिसं थःगु छाःगु नुगः व पश्चाताप मयाःगु नुगलं यानाः परमेश्वरया धार्मिक न्याय खने दइगु उगु तया दिया निति थःगु निति तं मुंका च्वंगु दु।

6 मनूतय्सं गथे गथे यात अथे अथे हे वय्कलं न्याय यानादी।*

7 धैर्यसाथं भिंगु ज्या यानाः प्रशंसा, इज्जत व नाश मजुइगु जीवन मालीपिन्त अनन्त जीवन बियादी।

8 ल्वापु यानाजुइपिं, सत्य खँ मानय् मयाइपिं, दुष्ट ज्याखँ यानाजुइपिं मनूतय्त परमेश्वरया क्रोध व तःधंगु तं लाइ।

9 मभिंगु ज्याखँ यानाजुइपिं सकलें मनूतय्त दकलय् न्हापालाक यह्दीतय्त अले यह्दीमखुपिन्त आपत व सह याये मफय्क दुःखकष्ट बियादी।

* 2:1 २२:१ मती ७:१; लूक ६:३७ * 2:6 २६:६ भज ६२:१२; हितो २४:१२

10 अथे हे दकलय् न्हापालाक भिंगु ज्याखँ यानाजुइपि यहदीतयत्, अले यहदीमखुपिन्त सदां दइगु मान, इज्जत व शान्ति बियादी।

11 परमेश्वरं ख्वा: स्वया: न्याय यानादी मखु।✧

12 व्यवस्था मसीकं पाप या:पि मनूत नं व्यवस्था मदयकं हे नाश जुइ। व्यवस्था स्यूपि यहदीतयसं पाप यात धा:सा इमित व्यवस्थां हे न्याय याइ।

13 परमेश्वरया न्ह्य:ने व्यवस्था न्यँ जक न्यनीपि मनूत धर्मी जुइ मखु, व्यवस्थाय् च्वया त: थें याइपि हे जक धर्मी जुइ।

14 यहदीमखुपिन्के व्यवस्था मदुसां इमिसं स्वभावं हे व्यवस्थाकथं म्वानाच्वन। थये मानय् या:गु हे इमिगु व्यवस्था ख:।

15 थुकथं हे इमिसं व्यवस्थाया खँ थ:पिनिगु नुगलय् च्वयात:गु दु धका: साक्षी बी। अले थ:पिन्सं हे ज्यू मज्यू ल्यइ।

16 परमेश्वरं न्याय यानादीबलय् वयकलं फुक्क मनूतयत् जिं न्यंकाच्वनागु भिंगु खँ च्वया त: थें ख्रीष्ट येशूपाखें फुक्क मनूतयगु मनय् दुने च्वंगु खँया न्याय यानादी।

व्यवस्था व यहदीत

17 छिमिसं “जिपि यहदी ख:” धका: व्यवस्थाया भलसाय् च्वना: “परमेश्वरयात म्हस्यू” धका: धक्कु त्व:ता जुल।

18 अले “वयक:या इच्छा स्यू धका: व व्यवस्थां हे स्यना कया: तत:धंगु ज्या याना जुल।

19 कांपिन्त लँ क्यनाबी फु, खिउँगु थासय् च्वंपिन्त ज: बी फु,

20 मूर्खतयत् कजय् याये फु” धका: धयाजुल। हानं “जिपि मस्तय् गुरु ख:, व्यवस्थाया खँ जिमिके दुगुलि सय्के सीके मा:गु फुक्क खँ जिमिसं स्यू” धका: नं धक्कु त्व:ता जुल।

21 थये मेपिन्त स्यना जुइ स:पिं छिमिसं थ:पिन्सं हे छाय् सयकाकाये मफुत? हानं मेपिन्त खुइ मज्यू धका: न्यंके स:पिं छिमिसं खुयाकाये ज्यू ला?

22 व्यभिचार याये मज्यू धका: धयाजुइपि नं छिपि हे, हानं छिमिसं हे व्यभिचार याये ज्यू ला? मूर्ति पुजा याये मज्यू धका: धयाजुइपि नं छिपि हे, छिमिसं हे मूर्ति पुजां कमय् याये ज्यू ला?

23 व्यवस्थाय् धक्कु त्व:ता जुइपिं छिमिसं हे व्यवस्थाय् च्वयात:गु खँ त्वाथला: परमेश्वरयात बांमलाके ज्यू ला?

24 धर्मशास्त्रय नं थ्व खँ थथे च्वयातःगु दु – “छिपि थें ज्याःपि मन्तयसं यानाः हे खः, यहदीमखुपिन्सं परमेश्वरयागु नां बांमलाकूगु।”☆

25 छिमिसं व्यवस्था मानय याःसा छिमिसं म्हय् चिं तयकूगु नं बां हे लात। व्यवस्थाय् च्वयातःगु खँ फुक्कं मानय याये मफुत धाःसा छिमिसं म्हय् चिं तःगु जूसां चिं मतःगु थें जुइ।

26 अयजूगुलि म्हय् चिं मतःम्ह मनुखं व्यवस्थाय् च्वयातःगु खँ मानय यात धाःसा व मनुखं म्हय् चिं मतःसां चिं तःगु थें मजुइ ला?

27 थथे म्हय् चिं मतःसां व्यवस्था मानय याःपि मन्तयसं छिमित दोषी ठहरय् याइ, छाथ्याःसा म्हय् चिं तःसां व च्वयातःगु नियम छिमिके दःसां छिमिसं व्यवस्था मानय मयाः।

28 पिनें जक यहदी जुया जूपि ला यहदी हे मखु। अथे हे पिनें सी दय्कः जक चिं तःपिनिगु चिं धाथेंयागु मखु।

29 दुनेंनिसें यहदी जुया जूपि हे जक यहदी खः। अले धाथेंयागु चिं नुगलय् च्वंगु चिं खः। थ्व चिं च्वयातःगु नियमं तःगु मखु, आत्मां तयादीगु खः। थज्याःपिन्त तःधंकीपिं मन्त मखु, बरू परमेश्वर खः।☆

3

परमेश्वर विश्वास याये बहःम्ह खः

1 थथे खः धयागु जूसा यहदीत जुइवं तुं छु फाइदा दतलय्? म्हय् चिं तःगु छु ज्यालगय् जुल?

2 न्हाखें नं इमित फाइदाया फाइदा जक दु। दकलय् न्हापालाक यहदीतय्त हे परमेश्वरयागु वचन लः ल्हानातःगु खः।

3 इपिं मध्ये सुं यहदीतय्सं विश्वास मयात धायेवं छु जुल धकाः? छु इमिसं विश्वास मयात धायेवं परमेश्वर विश्वास यायेबहः मजूम्ह जुइ ला?

4 गुबलें नं जुइ फइ मखु। फुक्क मन्त फताहा जूसां परमेश्वर सत्यम्ह हे जुयादी धकाः थथे धर्मशास्त्रय नं च्वयातःगु दु –

“छिं जिगु न्याय यानादीगु पाय्छि जू

अले जितः दोषी ठहरय् यानादीगु पाय्छि ताय्के।”☆

5 झीसं यानागु मभिंगु ज्यां परमेश्वरया धार्मिकता झन सीदत धा:सा झीसं छु धायेगु? परमेश्वरं तंचाया: झीत सजाँय बियादीवं परमेश्वर मभिंम्ह जुइ ला? (ध्व खँ जिं मनूतयसं थें धयाच्चनागु दु।)

6 थथे जुइ फइ मखु। थथे ख:सा परमेश्वरं संसारयात गथे याना: न्याय यानादी?

7 जिगु मभिंगु ज्याखं याना: परमेश्वर सत्यम्ह ख: धका: झन बांलाक सी दइ धा:सा जिं छाया हानं पापी थें जुया: इन्साफय लानाच्चनेगु?

8 गुम्हं गुम्हयसिनं जित: तसकं बांमलाका: जिं थथे धाल धका: धाइ – “मभिंगु याना: भिं जुया वइगु ख:सा मभिंगु जक छाया मयायेगु?” थज्या:पिं मनूतयसं त:धंगु सजाँय फयेमाली।

धर्मीम्ह सुं हे मदु

9 अयसा यहदीत जुल धका: झीपिं मेपिं मनूत स्वया: भिं जुल ला? मखु, झीपिं नं भिंपिं मखु। यहदीत व यहदीमखुपिं नं फुक्कं पापयागु पन्जाय लानाच्चंगु दु धका: ला दोष बी हे धुन।

10 धर्मशास्त्रय नं थथे च्वयात:गु दु –

“सुं हे धर्मीं मदु, अहं, छम्ह हे मदु।

11 परमेश्वरयात सुनानं मथु,
वयक:यात मालाजुइपिं सुं हे मदु।

12 इपिं मखुगु लँय वने धुंकल,
इपिं स्यनावने धुंकल।

भिंगु याइपिं छम्ह हे मदये धुंकल।✧

13 इमिगु कथुप्वा:

दिपया लुखा थें चा:।

इमिसं नवाइगु बिख दुम्ह सर्प न्या:गु थें ख:,

इमिगु म्हतुसि सर्पयागु बिख दइ।✧

14 इमिगु म्हतु सरा: व मभिंगु खं जक
जायाच्चंगु दु।✧

15 मनूतयत स्यायेत इमिगु तुति
न्ह्यज्या:।

16 इमिगु लँपुइ दु:खकष्ट व विनाश

✧ 3:12 ३:१०-१२ भज १४:१-३; ५३:१-३

✧ 3:13 ३:१३ भज ५:९; १४:०:३

✧ 3:14 ३:१४ भज

जक दु।

17 थज्याःपिन्सं शान्तियागु लँपु
म्हमस्यू।*

18 इमिके परमेश्वरयागु ग्याःभय
भ्याःभचा हे दइ मखु।”*

19 आः झीसं थ्व खँ सिल, व्यवस्थाय् च्वया तक्व फुक्कं व्यवस्था पालन याःम्हयसित जक धयातःगु खः। अयजूगुलि सुनानं छुं धाय्थाय् मदु। जिं हानं धाये – संसारयापिं फुक्क मनूत परमेश्वरया न्ह्यःने दोषी ठहरय् जुइ धुंकल।

20 व्यवस्थाय् च्वयातःगु नियम पालन यानाः सुं हे मनु धर्मीं जुइ फइ मखु। व्यवस्थां ला पाप छु खः धकाः क्यनाबी।*

विश्वासं धर्मीं जुइ

21 आः ला व्यवस्था मानय् याये म्वाय्क हे परमेश्वरं फुक्कसितं धर्मीं ठहरय् यानादी धयागु खँ सी दये धुंकूगु दु। व्यवस्था ब्यूम्ह मोशां व अगमवक्तातय्सं नं थथे जुइतिनि धकाः न्हापा हे च्वयातःगु दु।

22 येशू ख्रीष्टयात विश्वास याक्वसित परमेश्वरं धर्मीं ठहरय् यानादी, छायाधाःसा वय्कलं यहदी व यहदीमखुपिं धकाः पाकादी मखु।*

23 सकसिनं पाप याःगु दु, उकिं इपिं परमेश्वरया महिमां तापाय् धुंकल।

24 अय्यं परमेश्वर दयादुम्ह जूगुलि वय्कलं ख्रीष्टयात छ्वयाहयाः झीत सितिकं धर्मीं यानादिल।

25 परमेश्वरं येशू ख्रीष्टयात प्रायश्चितया बलिदान याकाः वय्कःयागु हिं वय्कःयात विश्वास याक्वसिगु पाप क्षमा यानादिल। वय्कलं न्हापा न्हापायापिं मनूतयगु पापया सजाँय मब्यूसे सह यानादिल।

26 वय्कः ख्वाः स्वयाः न्याय यानामदीम्ह परमेश्वर खः धकाः क्यनेत व येशूयात विश्वास याक्वसित धर्मीं ठहरय् यानादी धकाः क्यनेत वय्कलं थथे यानादीगु खः।

27 थथे खः धयागु जूसा झीसं छु खँय् तःधंछुइगु? छुं खँय् हे मदु। झी छु खँय् तःधनेगु? व्यवस्था मानय् यानागुलि मखु, बरु विश्वास यानागुलि खः।

28 व्यवस्था मानय् मयासें हे ख्रीष्टयात विश्वास याःम्ह मनूयात परमेश्वरं धर्मीं ठहरय् यानादी।

* 3:17 ३:१५-१७ यशै ५९:७-८ * 3:18 ३:१८ भज ३६:१ * 3:20 ३:२० भज १४३:३; गला २:१६

* 3:22 ३:२२ गला २:१६

29 छु परमेश्वर यहदीतय् जक परमेश्वर खः ला? वय्कः यहदीमखुपि मनूतय् परमेश्वर मखु ला? वय्कः यहदीमखुपि मनूतय् नं परमेश्वर खः।

30 परमेश्वर छम्ह हे जक जूगुलि वय्कलं म्हय् चिं तःपिन्त नं मतःपिन्त नं व हे विश्वासं धर्मी ठहरय् यानादी।✧

31 छु थ्व विश्वासं यानाः व्यवस्था ज्यालगय् मजुल ला? अहं, अथे मखु, बरु झीसं ला व्यवस्थायात झन जक बांलाक मानय् यानाचवनागु जुइ।

4

अब्राहाम विश्वासं धर्मी जूगु

1 अथे खःसा झी तापाःबाज्या अब्राहामया बारे छु धायेगु? वयात छु दत?

2 थथे अब्राहाम ज्यां यानाः धर्मी जूगु जूसा वं तःधंछुया जूसां जिल। वं थथे मयाःगुलि परमेश्वरलिसे व तःधंछुइगु लें मदु।

3 धर्मशास्त्रय् नं थथे च्वयातःगु दु –

“अब्राहामं परमप्रभुयात

विश्वास यात।

अले वय्कलं वयात धार्मिक मनूया

ल्याखय् तयादिल।”✧

4 ज्या याइम्हयसित दइगु ज्याला दान मखु, व ला वयागु कमाइ खः।

5 अयनं ज्या यानाः कमय् मयासें पापीतयत् धर्मी ठहरय् यानादीम्ह परमेश्वरयात विश्वास याइम्हयसिगु विश्वासं हे वयात धर्मी ठहरय् याइ।

6 दाऊद जुजुं नं थथे धर्मकर्म मयासें परमेश्वरं धर्मी ठहरय् याःम्ह मनूयात धन्यपि खः धयादिल –

7 “इपि धन्य खः,

सुयागु पाप व मभिंगु ज्या
क्षमा जूगु दु।

8 इपि धन्य खः,

सुयागु पापया ज्यायात
परमप्रभुं दोष मबिल।”✧

9 थथे दाऊद जुजुं सुवा: ब्युगु म्हय चिं तःपिन्त जक खः ला कि मतःपिन्त नं खः? अब्राहामं विश्वास याःगुलि हे धर्मी ठहरय् जुल।

10 अब्राहामयात गुबलय् धर्मी ठहरय् यात लय? म्हय चिं तये धुंकाः ला कि मतःनिबलय? वयात धर्मी ठहरय् याःगु म्हय चिं तये न्ह्यः हे खः, चिं तये धुंकाः मखु।

11 थथे चिं तये न्ह्यः हे विश्वासं यानाः वं धर्मी ठहरय् जुइगु छाप अथवा चिं काल। चिं मतःसां धर्मी ठहरय् जू धकाः परमेश्वरं धायेका जुइ धुंकूपिं सकल मनूतय् अबु यायेत वयात थथे यानादीगु खः।*

12 अले हानं चिं तये धुंकूपिं जूसां चिं दु धकाः भरोसा मतसे अब्राहामं चिं तये न्ह्यः याःगु विश्वासया लँपुइ जुइपिनि नं अबु यायेत खः।

विश्वासं हे परमेश्वरया बाचा पूवंगु

13 अब्राहामयात व वया सन्तानतय्त हे थ्व संसार बियादी धकाः बाचा चिनादीगु व्यवस्था मानय् याःगुलि मखु बरु विश्वासं धर्मी ठहरय् जूगुलि खः।*

14 व्यवस्था मानय् याःगुलि इमित थ्व संसार बियादीगु जूसा विश्वास छति हे ज्यालगय् मजुल, अले बाचा चिनादीगु नं सिंति वन।*

15 व्यवस्था मानय् याइपिन्सं व्यवस्था फुककं मानय् याये फइ मखु, उकि इमिसं सजाँय फयेमाली। अयजुगुलि गन व्यवस्था धयागु हे मद्दु, अन सजाँय धयागु नं फयेमाली मखु।

16 थथे जूगुलि हे वयागु विश्वासं यानाः परमेश्वरं नं व नाप बाचा चिनादीगु खः। अले परमेश्वरं दया माया यानादीगुलि व नाप बाचा चिनादीगु खँ वया फुकक सन्तानया लागि पक्का जुल। व्यवस्था मानय् याना च्वंपिनिगु लागि जक मखु, अब्राहामं थें विश्वास याना च्वंपिनिगु लागि नं, छायाधाःसा झी फुककसियां तापाःबाज्या ला अब्राहाम हे खः।*

17 थ्व हे खँ थथे च्वयातःगु दु – “जिं छन्त यक्व जात जातिया अबु याये धुन।” अब्राहामं विश्वास यानाच्वंम्ह परमेश्वरं व झी अबु धकाः स्यू। परमेश्वरं सीम्हयसित हानं म्वाके फु, अले द हे मद्दुगु चिज नं दयकादी फु।*

18 अब्राहामयात थ्व हे परमेश्वरं – “जिं छन्त यक्व जात जातिया अबु याये धुन” धकाः धयादीगु खँ जुइ हे फइ मखु थें च्वंसां वं परमेश्वरयाके भरोसा तया

* 4:11 ४:११ उत १७:१० * 4:13 ४:१३ उत १७:४-६; २२:१७-१८; गला ३:२९ * 4:14 ४:१४ गला ३:१८ * 4:16 ४:१६ गला ३:७ * 4:17 ४:१७ उत १७:५

जूगुलि वयात “छं सन्तान नं नगु थें दइ” धका: धयादी थें तुं व यक्व मनूतय् अबु जुल।✧

19 वयागु म्ह सी धुंकूम्हयसिगु थें सुकूगना वंसां, छायाधा:सा व थुबलय् सछि दँ दइन, अले हानं सारायागु प्वाथय् दये फइ थें मच्चंसां व विश्वासं छप्ति हे लिमची।✧

20 परमेश्वरं धयादीगु खँय् वं विश्वास मयायेगु व संका तक नं यायेगु मया:। परमेश्वरयात त:धंका जूगुलि व विश्वासय् झन झन बल्लानावन।

21 छायाधा:सा परमेश्वर थ:म्हं बियादीगु बचं पूर्वकादी फुम्ह ख: धका: वं बांलाक स्यु।

22 उकिं ला ख: नि, विश्वासं याना: वयात धर्मी ठहरय् या:गु।

23 वयात धर्मी ठहरय् या:गु खँ वयात जक च्वयात:गु मखु, झीत नं ख:।

24 झी प्रभु येशू सी धुंकूसां हानं म्वाका दीम्हयसित विश्वास यानाच्चनागुलि झीत नं धर्मी ठहरय् यानादी।

25 झीत पापं छुतय् यायेत येशूयात स्याकेत ल:ल्हानादिल, अले झीत धर्मी ठहरय् यायेत हानं म्वाकादिल।✧

5

झीपिं नं विश्वासं धर्मी जूगु ख:

1 थुकथं झीगु विश्वासं झीत धर्मी ठहरय् यानाबी धुंकूगुलि झी प्रभु येशू र्खीष्टयापाखें परमेश्वरलिसे झीपिं मिलय् जुइदत।

2 वय्कलं झीत विश्वासपाखें परमेश्वरया दया मायाय् हयादीगु दु। थौं झीपिं व हे क्षमा बीगु दया मायाय् दु। त:धंम्ह परमेश्वरया महिमाय् झीपिं नं च्वने दइतिनि धका: झीसं स्युगुलि झीगु मन लय्ता:।

3 थुलि जक मखु, दु:खकष्ट जुयाच्चंबलय् नं झीपिं लय्ता:, छायाधा:सा दु:खकष्टं धैर्य व सह यायेगु शक्ति दय्काबी।

4 थथे दु:ख सह यायेफत धा:सा झीगु मन नं बल्लाइ। थथे झीसं परमेश्वरयाके आशा तयाच्चन धा:सा

5 झीत निराश याइ मखु, छायाधा:सा परमेश्वरं झीत पवित्र आत्मा बियादीगु दु। पवित्र आत्मां झीगु नुगलय् परमेश्वरयागु माया तयादीगु दु।

6 झीसं थःम्हं थःगु मुक्तिया लागि छुं याये मफुबलय् ख्रीष्ट पापीतय्गु निंति पाय्छि इलय् सिनादिल।

7 तसकं भिंम्ह मनूया लागि सुं नं मनू सीत बल्लतल्लं जक न्ह्यचिली। धात्थें धायेगु खःसा अज्याःपि मनूत तसकं कम हे जक दइ।

8 तर झी पापी जुयाच्चंबलय् हे ख्रीष्ट झीगु पलेसाय् सिनादीगुलि झीत परमेश्वरं माया यानादीगु दु धकाः सी दु।

9 थथे ख्रीष्टयागु हिं झीपिं धर्मीं ठहरय् जुइ धुंकल धाःसा वय्कलं झीत इन गुलि जक अप्वः परमेश्वरयागु तंपाखें बचय् याना तइगु जुइ।

10 झीपिं परमेश्वरया शत्रु जूबलय् हे वय्कःया काय् झीगु पलेसाय् सिनाः झीत वय्कः नाप मिलय् यानादिल धाःसा वय्कलं हे झीत गुलि जक अप्वः बचय् याना तइगु जुइ।

11 थुलि जक मखु, झीत परमेश्वर नाप मिलय् यानादीम्ह झी प्रभु येशू ख्रीष्टं यानाः वय्कः नाप झीपिं लय्ताय् खन।

आदम व ख्रीष्ट

12 छम्ह मनूखं यानाः थ्व संसारय् पाप वल। अले थ्व पापं यानाः मनूत सी माल। फुक्क मनूतय्सं पाप याःगुलि फुक्क मनूत सी माल।*

13 मनूतय्त व्यवस्था हे मब्यूनिबलय् निसें थ्व संसारय् पाप दु। व्यवस्था मदुगु जूसा पापयागु ल्याः मतइगु खः।

14 मनूतय्गु पाप आदमं आज्ञा मानय् मयासें याःगु पाप थें मखुसां आदमयागु पालनिसें मोशायगु पालय् तक मनूत सी हे माल। आदम वइतिनिम्ह छम्ह मनू थें च्वंम्ह जक खः।

15 परमेश्वरं सिंति बियातःगु वरदान व आदमयात बियादीगु सजॉय यक्व हे पाः। छम्ह मनूखं याःगु पापं यक्व मनूत सित धाःसा छम्ह हे मनू येशू ख्रीष्टं यानाः दुगु परमेश्वरयागु दया माया व सिंति बियादीगु वरदानं यक्व मनूतय्त बचय् यात।

16 अले हानं सिंति बियादीगु वरदान आदमं याःगु पाप थें मखु। छम्ह मनूखं याःगु पापं यानाः यक्व मनूतय्त दोषी ठहरय् यात धाःसा छम्ह मनूखं हःगु उद्धारं नं यक्व मनूतय्त धर्मीं ठहरय् यात।

17 यदि छम्ह मनूखं याःगु पापं यानाः मृत्युं राज्य यानाच्चन धाःसा छम्ह मनू येशू ख्रीष्टं यानाः परमेश्वरया तःधंगु दया मायां वय्कःया न्ह्यःने धर्मीं ठहरय् जुइपिं मनूत मृत्युया राज्यय् च्वनेमाली मखुत।

18 गथे छम्ह मनुखं याःगु पापं यानाः फुक्क मनु दोषी जुल, अथे हे छम्ह मनुखं याःगु धार्मिकताया ज्यां यानाः फुक्क मनुत धर्मी जुल व इमित अनन्त जीवन दत।

19 अले हानं गथे छम्ह मनुखं परमेश्वर मानय् मयाःगुलि यक्व मनुतयत् पापी यात, अथे हे छम्ह मनुखं परमेश्वरयात मानय् याःगुलि यक्व मनुतयत् धर्मी यात।

20 व्यवस्थां यानाः पाप अप्वः दयावल। अयनं गन पाप यक्व दयावल, अन परमेश्वरयागु दया माया इन अप्वः दत।

21 थथे जूगुलि पापं यानाः फुक्क मनुत सीमाः थें तुं परमेश्वरयागु दया मायां धर्मी ठहरय् जुयाः झी प्रभु येशू ख्रीष्टयापाखें मनुतयत् अनन्त जीवन दत।

6

पापपाखें मृत्यु व ख्रीष्टपाखें जीवन

1 थथे खः धयागु जूसा आः झीसं छु धायेगु लय? परमेश्वरं झीत दया माया अप्वः यायेमा धकाः छु झीसं पाप याना हे च्वनेगु ला?

2 अथे मखु। पापयागु निति झीपि सीधुंकाः हानं पापय् तुं गथे म्वानाच्वनेगु?

3 झी फुक्कसिनं ख्रीष्ट येश्यागु नामं बप्तिस्मा कयागुलि झीसं बप्तिस्मा कयाबलय् झीपि नं वय्कः थें तुं सी धुंकल धकाः छिमिसं मस्यु ला?

4 थुकथं झीसं बप्तिस्मा कयाबलय् झीपि नं वय्कः थें तुं सी धुंकूगुलि वय्कः नाप झीत नं थुने धुंकल। थथे सीधुंकाः ख्रीष्टयात परमेश्वर बाःयागु अजू चाइपुगु शक्तिं म्वाकादीगुलि झीपि नं न्हगु जीवनया पहलं म्वानाच्वनेमा।☆

5 वय्कः सी थें झीपि नं सी धुंकल धयागु खःसा वय्कः सीम्हं म्वाना वः थें झीपि नं सीसां म्वाना वइतिनि।

6 झीगु पापी जीवन नाश जुयावनेमा धकाः झीगु पुलांगु जीवन वय्कःलिसें कूसय् यख्खाना बी धुन धकाः झीसं स्यु। अयज्जुगुलि आः झीसं पापी ज्याखें याना जुइ जि हे मज्यु।

7 सी धुंकूम्ह मनु पापं मुक्त जूगु दु।

8 थुकथं ख्रीष्टलिसे झीपि सी धुंकल धाःसा वय्कःनाप च्वने दइगु विश्वास झीके दु।

9 सिनाः हानं म्वानादी धुंकूम्ह ख्रीष्ट गुबलें हे सी मखुत धकाः झीसं स्यु। मृत्युं वय्कःयात गुबलें हे नं बुके फइ मखुत।

10 फुक्कसिगु पापयागु निंति वय्कः छक्कलं सिनादिल। आः धाःसा वय्कः परमेश्वरया लागि हे म्वानादी।

11 थथे जूगुलि छिपिं नं पापयागु निंति सिनाः ख्रीष्ट येशूं यानाः परमेश्वरया लागि म्वाय् दत धकाः लुमंका च्वेँ।

12 अयजूगुलि छिमिसं सी मानिगु शरीरयागु निंति पापी ज्या याना जुइ मते। छिमिसं शरीरयात यःथें याना जुइ मजिल।

13 शरीरय् च्वंगु छुनं म्हब्बयात छिमिसं पापी ज्या यायेगु ज्याभः याये मते। सिनाः हानं म्वाके धुंकुपिं मनूत जूगुलि छिपिं थथःम्ह हे परमेश्वरं धाःथें मानय् जुयाच्चनेमाः। अले छिमिगु शरीरया म्हब्बत भिंगु ज्याखँ यायेगु ज्याभःकथं परमेश्वरयात देछाया ब्यु।

14 पापयागु अधीनय् छिपिं च्वनेमाली मखुत, छायाधाःसा छिपिं व्यवस्थाया अधीनय् च्वनेमाःगु मनूत, बरु परमेश्वरयागु दया मायां म्वानाच्चंपिं खः।

15 थथे खः धयागु जूसा आः छु यायेगु लय्? इति परमेश्वरं दया माया यानादीगुलि इपीपिं व्यवस्थां धाःथें च्वनेम्वाः धकाः इीसं पाप यानाजुइगु ला? अहं, थथे ला ख हे मखु।

16 दासतय्सं मालिकयात मानय् याःथें छिमिसं सुयात मानय् यात छिपिं वया हे दास जुइ, नरकय् यंकीगु पापयात मानय् याःगु छाये मजुइमा, अथवा परमेश्वरया न्हःने धर्मी ठहरय् जुइत मानय् याःगु छाये मजुइमा, छुं पाइ मखु।

17 छिमिसं दुनुगलानिसें छिमित स्यना थकूगु तःधंगु खँयात मानय् याःगुलि न्हापा थें छिपिं आः पापया दास मखुत। उकिं परमेश्वरयागु जय जुइमा।

18 छिमित पापयागु पन्जां त्वःतका बी धुंकूगुलि छिपिं परमेश्वरया दास जुल।

19 छिमिसं बांलाक थुइके थाकुइ धकाः जिं मनूतय्सं थें धयाच्चनागु खः। न्हापा छकः छिमिसं पापी ज्याखँ जक यायेगुलि अप्वः मन तया जुइ धुंकू थें आः भिंगु ज्याखँ अप्वः मन तया जु। आः पवित्र जुइत छिमिगु जीवन परमेश्वरया निंति लःल्हानाब्यु।

20 छिपिं पापयागु दास जुयाच्चंबलय् धार्मिकतापाखें स्वतन्त्र खः।

21 न्हापा लज्या चायापुगु ज्या जक याना जुयाबलय् छिमित छु इनाम दत? थथे लज्या चायेमाःगु ज्याखँ यानाजुइपिं मनूत लिपा नरकय् वनी।

22 आः धाःसा छिमित पापं त्वःतका बी धुंकूगुलि छिपिं परमेश्वरया दास जुल। थथे छिमिसं वय्कःयात यःथें जक याःगु पलेसाय् छिमित अनन्त जीवन दइ।

23 पापया ज्याला मृत्यु खः। परमेश्वरं सितिकं बियादीगु वरदान झी प्रभु येशू ख्रीष्टयाके अनन्त जीवन खः।

7

ब्याहाया उपमा

1 यःपिं दाजुकिजापिं, जिं व्यवस्था सःपिं मनूत नाप नवानाच्चनागु खः धकाः छिमिसं थुइकि। छिमिसं मस्यू ला? म्वाना च्वंतले जक मनूत व्यवस्थां धाःथें च्वनेमाः।

2 बियाछवये धुंकूमह मिसाया भाःत मसीतले व मिसां भाःतयात त्वःते मज्यू धकाः व्यवस्थां धाःगु खँ मानय् याये हे माः। अयूनं भाःत सित धाःसा व्यवस्थां भाःतयात त्वःते मज्यू धकाः धाःगु आज्ञा मानय् याये म्वाः।

3 भाःत म्वानाच्चंबलय हे मेम्ह मनूनापं ब्याहा याःसा वयात स्यंम्ह मिसा धकाः धाइ। भाःत सीधुंकाः व व्यवस्थापाखें मुक्त जुइ। मेम्हलिसे ब्याहा याःसां स्यंम्ह मिसा धकाः धाइ मखु।

4 अथे हे छिपिं नं ख्रीष्टनापं सी धुंकूगुलि आः व्यवस्थायागु अधीनय् च्वनेमाःगु मन्त। उकिं दाजुकिजापिं, झीसं परमेश्वरया नितिं यक्व फल सय्केत सिनाः म्वाना ज्ञायादीम्ह ख्रीष्टनाप मिलय् जुयाच्च्वनेमाः।

5 न्हापा झीपिं मनू स्वभावया पापं जाःगु इच्छा कथं म्वाना च्वनापिं खः। उबलय् व्यवस्थां झीगु इच्छायात क्वत्यला तःगुलि झीत पाप याकेबिल। थ्व फुक्क ज्या मृत्युयागु लेंपुं जक खः।

6 आः झीपिं व्यवस्थायागु अधीनय् च्वनेमाःगु मन्त। झीत चिनातःगु व्यवस्थाया नितिं झीपिं सी धन। अयजूगुलि न्हापा थें व्यवस्थाया अधीनय् च्वनेमाःगु मन्त, बरु आवंलि ख्रीष्टयागु आत्मां धाःथें झीसं परमेश्वरयागु सेवा यायेमाः।

व्यवस्था व पाप

7 अयसा झीसं आः छु धायेगु? छु व्यवस्था पाप खः ला? थ्व ला जुइ हे फइ मखु। अयूनं व्यवस्था मदुगु जूसा जिं पाप म्हसीके फइ मखुगु। व्यवस्थायागु सफुलिइ “छं लोभ याये मते” धकाः च्वयामतःगु जूसा जिं लोभ छु खः धयागु हे सी मखुगु।☆

8 थ्व हे आज्ञायागु ग्वाहालि कयाः पापं जितः लोभ याये सय्का बिल। व्यवस्था मदुगु जूसा पाप नं दइ मखुगु।

9 जि छकः ला व्यवस्था मसीकं म्वानाच्चने धुकूमह मनू खः। गुबलय् आज्ञा सिल अबलय् पाप म्वात।

10 अले जि सित। जीवन बी धकाः धाःगु आज्ञा ला जितः स्याना छ्वइम्ह जुल।

11 पापं आज्ञायाम् ग्वाहालि कयाः जितः झंगः लात। थुकथं जितः स्यानाबिल।☆

12 अयजूगुलि व्यवस्था पवित्रगु खः। अले आज्ञा नं पवित्र, धर्मी व भिंगु खः।

13 अयसा थज्याःगु भिंगुलि हे जितः स्यानाबिल ला? थथे ला गुब्सं नं मजुइमा। पापं यानाः दुने दुने मभिं जुयाः जितः स्याःगुलि जिं पापयात म्हसीके फत। अले हानं आज्ञां यानाः नं पाप झन ग्यानापुसे च्वन।

मनूया निगू स्वभाव

14 व्यवस्था आत्मिक खः धकाः झीसं स्यू। जि धाःसा आत्मिक मखु अयनं पापया ल्हातय् मियातःम्ह मनू जि हे खः।

15 जिं यानाच्चनागु ज्या जिं हे मथ्, छायधाःसा जितः छु यः व जिं मयाना, बरु जितः मयःगु छु खः व हे जक यानाच्चना।☆

16 थुकथं जिं जितः मयःगु ज्या यात धाःसा जिं व्यवस्था भिं जू धकाः मानय् याये।

17 अयजूगुलि थज्याःगु ज्या याइम्ह जि मखु, बरु जिके च्वंम्ह पाप खः।

18 जिगु मनय् छुं नं भिंगु खं थाय् मकाः धकाः जिं सिल। मनं भिंगु याये मास्ति वःसां जिं याये मफु।

19 थुकथं जिं याये मास्ति वःगु भिंगु ज्या याये मफु, बरु याये मास्ति मवःगु मभिंगु ज्या जक यानाच्चना।

20 थथे जितः मयःगु हे जक याना जुल धाःसा थथे याइम्ह जि मखु, बरु जिके दुने च्वंम्ह पाप खः।

21 जिं भिंगु ज्या यायेत्यनाबलय् हे, मभिंगु ज्या याकिम्ह जिगु न्ह्यःने च्वंवइ धकाः जिं स्यू।

22 परमेश्वरयागु व्यवस्था दुनुगलंनिसें मानय् यानाच्चने दुसा जि लय्ताया।

23 जिगु म्हयागु व्यवस्था व मनयागु व्यवस्थाया दथुइ ल्वापु जुयाच्चंगु जिं चा। थुकथं पापयागु व्यवस्थां जितः त्याकाः चिनातल।

24 जि ला तसकं हे आपतय् लानाच्चन। थज्याःगु सी मालिगु ज्याखँ यानाच्चनागु जिगु म्हयात सुनां बचय् याइ?

25 झी प्रभु येशू ख्रीष्टयापाखें परमेश्वरयात सुभाय। छायाधाःसा जिगु मनं ला परमेश्वरयागु व्यवस्था हे मानय याः। अयनं जिगु म्हं धाःसा पापया दास जुयाः सेवा यानाच्चन।

8

ख्रीष्टपाखें न्हगु जीवन

1 अयजूगुलि ख्रीष्ट येशू नाप मिलय जुयाच्चपिं दोषी जुइ मखु।

2 आः ला झीत येशू ख्रीष्टपाखें न्हगु जीवन बियादीम्ह परमेश्वरया आत्मां पाप व मृत्युयागु व्यवस्थां मुक्त यानादीगु दु।

3 झीपिं बमलाःबलय् व्यवस्थां यायेमाःगु ज्या याये मफुगुलि परमेश्वरं थःकाययात छवयाहयादिल। वयकः झीपिं थें तुं मनू जुयाः झीगु पाप सिला छवयेत बलिदान जुयादिल। थथे यानाः वयकलं झीगु शरीरय् पापयागु दोष क्यनादिल।

4 अयजूगुलि व्यवस्थां धाःगु खँ पूवनेमा झीपिं मनूतयगु ज्याखं धाःथें यायेत मखु, बरू पवित्र आत्मां धाःथें यानाजुइपिं खः।

5 शरीरयात यःथें यानाजुइपिं मनूतयसं शरीरयागु ज्याखँय् हे मन तथा जुइ। आत्मायात यःथें यानाजुइपिं मनूतयसं आत्मायागु ज्याखँय् हे मन तथा जुइ।

6 शरीरयात यःथें यानाजुइपिं मनूत सी। पवित्र आत्मायात यःथें यानाजुइपिं मनूतयत न्हगु जीवन व शान्ति दइ।

7 शरीरयात यःथें यानाजुइपिं परमेश्वरया शत्रु खः, छायाधाःसा थज्याःपिं मनूतयसं परमेश्वरयागु व्यवस्था मानय याइ मखु, अले हानं मानय याये फइ नं मखु।

8 शरीरयात यःथें यानाजुइपिं मनूतयसं परमेश्वरयात लयतायके फइ मखु।

9 धातथें परमेश्वरयागु आत्मा छिमिके दु धयागु जूसा शरीरयात यःथें यानाजुइपिं मखु, बरू आत्मायात यःथें यानाजुइपिं छिपिं खत, अले ख्रीष्टयागु आत्मा मदुम्ह मनू ख्रीष्टयाम्ह मनू जुइ फइ मखु।

10 ख्रीष्ट छिमिके च्वनादीगु दुसा पापं यानाः छिमिगु शरीर सी धुंकूसां परमेश्वरया न्हःने धर्मी ठहरय् जूगुलि छिमिगु आत्मा म्वानाच्चनी।

11 सी धुंकूम्ह येशूयात म्वाकादीम्ह परमेश्वरया आत्मा छिमिके दुसा ख्रीष्ट येशूयात सीगुपाखें म्वाकादीम्हयसिनं छिमिगु सीमाःगु शरीरयात नं म्वाकादी।*

12 अयजूगुलि यःपिं दाजुकिजापिं, झीसं शरीरयात यःथें याना जुइत म्वाना च्वनेमाःगु मन्त।

* 8:11 ८:११ १ कोर ३:१६

13 छिमिसं शरीरयात यःथें याना जुया च्वंसा छिपिं सी। शरीरयात यःथें याना मजुसे बरु परमेश्वरया आत्मायात यःथें याना जूसा छिपिं म्वाइ। अथे याना जूसा आत्मां छिमिगु यत्थेंज्याःगु चालचलन त्वःतकादी।

14 थुकथं परमेश्वरया आत्मायात यःथें यानाजुइपिं मनूत फुक्कं परमेश्वरया सन्तान खः।

15 थथे खः धयागु जूसा परमेश्वरया न्ह्यःने दास थें ग्याना च्वनेमाःगु मन्त, बरु काय् जुइगु आत्मा झीत बियादीगुलि झीपिं वय्कःया सन्तान खः धकाः झीसं धाये दत। थथे झीसं “अब्बा, बाः” धकाः धाये दत।*

16 झीगु आत्मानाप मिलय् जुयाः परमेश्वरयागु आत्मां झीपिं परमेश्वरया सन्तान खः धकाः साक्षी बी।

17 थथे झीपिं परमेश्वरया सन्तान खःसा झीपिं हक दुपिं नं जुल। परमेश्वरया हक दुपिं व ख्रीष्टनापं पूरा हक दुपिं झीपिं नं खत। वय्कः नाप दुःख सिल धाःसा झीपिं नं वय्कःनापं तुं तःधनी।*

लिपा दइगु महिमा

18 जिं स्वयबलय् थौकन्हय् झीत जुयाच्वंगु दुःखकष्ट ला लिपा झीत दइ तिनिगु सुख नाप दाना स्वयेबलय् छुं हे मखु।

19 फुक्क सृष्टि परमेश्वरं थः सन्तानतयत् क्यनेगु दिं स्वयेत आयबुया च्वंगु दु।

20 छायाधाःसा सृष्टि ज्यालगय् मजुइ धुंकल। थ्व खँ सृष्टिया इच्छां जूगु मखु, बरु परमेश्वरं हे थथे यानादीगु खः।*

21 सृष्टि थः हे नं स्यनेगुपाखें बचय् जुयाः लिपा परमेश्वरया सन्तानलिसें तःधनी तिनि धयागु आशा दु।

22 आः तक फुक्क सृष्टि मचाबू ब्यथा जू थें दुःखकष्ट सी मालाच्वंगु दु धयागु खँ झीसं स्यू।

23 सृष्टि जक मखु, झीपिं नं आत्माया न्हापांयागु फल दुपिं झीपिं थःपिं हे नं परमेश्वरया लहिनातःपिं सन्तान थें जुयाः उद्धारया निरितिं आयबुयाच्वना।*

24 थ्व हे आशा यानाच्वनेत ला खः नि, झीत अनन्त जीवन बियादीगु। खनेदुगु आशा ला आशा हे मखु। खने दुगुयागु सुनानं आशा याइ ला?

* 8:15 ८:१५ मर्क १४:३६; गला ४:६ * 8:17 ८:१५-१७ गला ४:५-७ * 8:20 ८:२० उत ३:१७-१९ * 8:23 ८:२३ २ कोर ५:२-४

25 झीसं खंके मफुगु आशा यानागु खः धयागु जूसा थ्व आशाय् संका मयासें, अले हथाय् मचासे झीसं पियाच्चनेमाः।

26 गथे यानाः प्रार्थना यायेमाः धकाः झीसं मस्यगुलि व झीगु विश्वास बमलाःगुलि पवित्र आत्मां झीत ग्वाहालि यानादी। थथे पवित्र आत्मा थःमह्यसिनं हे माक्व खँ धयाः झीगु नितिं बिन्ति यानादी।

27 मनुतयगु मन सीके फुम्ह परमेश्वरं पवित्र आत्मायागु खँ नं स्यू। वय्कःयात गथे यइ अथे आत्मां नं विश्वासीतयगु नितिं परमेश्वरयात बिन्ति यानादी।

28 परमेश्वरयात माया याइपिं, अले वय्कलं थःगु इच्छा पूर्वकेत ल्ययातःपिन्त दक्व ज्या मिलय् यानाः भिं जुइकथं हे वय्कलं ज्या यानादी धकाः झीसं स्यू।

29 परमेश्वरं न्हापांनिसें महस्यूपिन्त वय्कःया काय् थें यानादीत न्हापांनिसें हे ल्यया तथादिल। वय्कः यक्व किजापिं मध्ये जेठाम्ह जुइमा धकाः थुकथं यानादीगु खः।

30 वय्कलं न्हापांनिसें ल्ययातःपिन्त सःता नं दिल। थथे वय्कलं सःतादीपिन्त धर्मी ठहरय् यानादिल। थुकथं वय्कलं धर्मी ठहरय् याःपिन्त तःधं नं यानादिल।

ख्रीष्टयागु माया

31 आः थ्व खँयात झीसं छु धायेगु? परमेश्वर झीनाप दीसा झीनाप ल्वाइपिं सु?

32 सुनां थःकाय्यात हे ल्यंका मतसे झी सकसिगु नितिं स्याकेत बियादीम्ह परमेश्वरं वय्कःया कायपाखें झीत माःगु फुक्कं गथे बियामदी?

33 परमेश्वरं ल्ययातःपिन्त सुनां दोषी याये फइ? धर्मी यानादीम्ह परमेश्वर हे खः धाःसा

34 सुनां इमित दोषी याइ? दोषी यानादीम्ह ला सिनाः म्वानादी धुंक्म्ह ख्रीष्ट येशू हे खः। थ्व हे येशू परमेश्वरया जव ल्हाःपाखे दी। अले वय्कलं झीगु नितिं परमेश्वरयात बिन्ति यानादी।

35 ख्रीष्टयागु मायां झीत सुनां फाये फइ? छु झीत दुःखकष्ट जुल धकाः, म्वाय् थाकुल धकाः, सास्ती बिल धकाः, नये मखन धकाः, पुनेगु मन्त धकाः, ग्यानपुगु वल धकाः, अले तरवारं पाली धकाः झीसं ख्रीष्टयात त्वःते जिल ला?

36 थ्व हे खँ भजन सफलिइ नं थथे च्वयातःगु दु –

“अयनं जिपिं छिगु लागि

न्हियान्हिथं सी मालाच्वंगु दु।

स्यायेत हःपिं फैचातयूत थें

जिमित व्यवहार याइगु।”☆

37 अयनं झीसं दुःखकष्ट सी माःसां झीत माया यानादीम्हयूसिनं यानाः झीपि त्याका वःपि स्वयाः नं तःधपिं खः।

38 सुनानं अले छुकि हे नं परमेश्वरयागु मायां झीत त्वःतके फइ मखु धकाः जिं स्यू। न मृत्युं, न जीवनं, न स्वर्गदूततयसं, न शैतानया दूततयसं, न संसारयागु शक्तिं, न थौकन्हय जुयाच्चंगु खं, न लिपा जुइतिनिगु खं,

39 न च्वय्यागु, न क्वय्यागु, न सृष्टिया छुं नं शक्तिं झीत प्रभु येशू ख्रीष्टयाके दुगु वय्कःया मायां फाये फइ।

9

परमेश्वरं इस्राएली जातियात ल्ययादीगु

1 जि ख्रीष्टयाम्ह मनू जूगुलि जिं सत्य खँ ल्हाना च्वना। जिं मखुगु खँ धयाच्चवनागु मखु। जिके पवित्र आत्मा दीगुलि जिगु विवेकं थ्व खँ धात्थें खः धकाः साक्षी बी।

2 जितः यःपि इस्राएली दाजुकिजापि खनाः जि तसकं नुगः मछिं अले जिगु नुगः हीसे च्वंगु दु।

3 इमिगु नितिं परमेश्वरयागु सराः फयेमाःसां, अले ख्रीष्टलिसे बायमाःसां बाय,

4 छायाःसा इपिं परमेश्वरं ल्ययातःपिं जातियापिं खः। वय्कलं इमित थः हे कायपिं यानाः इमिगु दथुइ च्वनाः वय्कःयागु तःधंगु शक्ति क्यनादिल। इपिं नाप बाचा चिनाः व्यवस्था नं बियादिल। वय्कःया आराधना यायेगु स्यनादिल, अले बचं नं बियादिल।☆

5 ख्रीष्टया तापाःबाज्यापि इमि नं तापाःबाज्यापि खः। ख्रीष्ट थः नं इपि थें थ्व हे जातय् बगु खः। वय्कः दक्वसित राज्य यानादीम्ह परमेश्वर खः, वय्कः सदां तःधनेमा। आमेन।

6 यहूदी जातयापिन्सं थौं तकं ख्रीष्टयात विश्वास मयाःसां परमेश्वरं बाचा चिनाः धयादीगु वचन सिति वंगु जुइ मखु। छायाःसा यहूदी जातय् बूपिं सकलें परमेश्वरया मनूत मखु।

7 अथे हे अब्राहामया सन्तान फुक्कं परमेश्वरया सन्तान जुइ मखु। छायाःसा “इसहाकयापाखें हे छिमि सन्तान दइ” धकाः परमेश्वरं धयादीगु दु।☆

8 अयजूगुलि अब्राहामया इच्छां दुपि सन्तान जुइवं परमेश्वरया सन्तान जुइ मखु। बचंया सन्तान जक परमेश्वरया सन्तान खः।

9 उकि हे ला खः नि, परमेश्वरं “श्व हे इलय् थन लिहां वये, उबलय् छिमि कलाः साराया काय् दये धुंकी” धकाः धयादीगु।✧

10 श्व काय् झी तापाःबाज्या इसहाक खः। वं रिबेकानापं ब्याहा याये धुंकाः वं निम्ह काय्पिन्त नापं बुइकल।

11 अले निम्हं काय् बुइ न्ह्यः हे, अले भिगु मभिगु ज्याखँ मयाःनिबलय् हे थःत यःथें परमेश्वरं ल्ययादिल।

12 थथे धर्मकर्मकथं मखु, बरु परमेश्वरं ल्ययादीकथं रिबेकायात धयादिल –
“तःधीम्हय्सिनं चीधीम्हय्सिगु सेवा याइ।”✧

13 “याकूबयात माया याना,
एसावयात धाःसा मययका।”✧

14 श्व खँय् झीसं छु धायेफु? थथे धायेवं तुं परमेश्वरं अन्याय यानादी ला? अथे ला गुब्सं नं यानादी मखु।

15 वयकलं मोशायात नं थुकथं धयादिल –

“जिं सुयात कृपा याये मास्ति वइ
वयात कृपा याये।

जिं सुयात दया याये मास्ति वइ
वयात दया याये।”✧

16 थुकि सीदत, श्व खँ फुक्कं परमेश्वरयागु दयां यानाः जक जूगु खः, मनूया कुतलं व मनूयात यःथें यानाः जूगु मखु।

17 धर्मशास्त्रय् परमेश्वरं फारोयात थथे धयादीगु दु –

“अयनं जिगु शक्ति क्यनेत
व पृथ्वीइ न्यंक जिगु नां कायेमा धकाः हे
जिं छन्त म्वाकातयागु खः।”✧

✧ 9:9 ९:९ उत १८:१० ✧ 9:12 ९:१२ उत २५:२३ ✧ 9:13 ९:१३ मला १:२-३ ✧ 9:15
९:१५ प्रस ३३:१९ ✧ 9:17 ९:१७ प्रस ९:१६

18 अयजूगुलि वयकलं दया यानादी मास्ति वःमहयूसित दया यानादी। अले सुयागु नुगः छायाके मास्ति वः वयात छायाकादी।

कुमाः व थलबल

19 छिमिसं जितः थथे न्ह्यसः याइ – “अयूसा परमेश्वरं झीत छाया दोष बियादीगु लय सा?” वयकःयागु इच्छायात पने फुम्ह सु दु?

20 मनू जुयाः परमेश्वरयात लिसः बीम्ह छ सु खः? जितः छाया थथे दयका धकाः दयकातःगु सामानं दयकूमहयूसित न्ह्यसः याइ ला?*

21 छु छम्ह कुमाःयात न्हायातःगु चां बुत्ता तयातःगु थल दयकेगु व बुत्ता तया मतःगु थल दयकेगु अधिकार मदु ला?*

22 परमेश्वरया तं व थःगु शक्ति क्यनादी मास्ति वःसा वयकःयात सुनां पने फइ? वयकलं थःत हीमी चायका च्वंपि मनूत खनाः नं तंचाया मदिसे सहयाना तुं च्वनादिल।

23 वयकलं झीत वयकःयागु दया मायायागु धुकू सीके बीत थथे दया माया यानादीगु खः। वयकलं झीत न्हापांनिसें थःगु नां तःधकेत ल्ययादीगु खः।

24 थथे सःतेत ल्ययातःपि झीपि हे खः। यहदीत जक मखु, यहदीमखुपिन्त नं वयकलं सःतादिल।

25 थ्व हे खँ होशेयागु सफुलिइ च्वयातःगु दु –

“थः मनू मखुपिन्त

जिं थः मनू याये,

अले माया मयानाम्हयूसित

जिं ‘माया याइम्ह’ धकाः धाये।”*

26 अले

“हानं थथे च्वयातःगु दु –

‘छिपिं थः मनूत मखु’ धकाः

धयातःगु थासय्

‘म्वाःम्ह परमेश्वरया कायपिं

धकाः इमित धाइ।’ ”*

* 9:20 १:२० यशै २६:१६; ४५:९ * 9:21 १:२१ यर १८:१-१०; २ तिमो २:२०-२१ * 9:25 १:२५
होशे २:२३ * 9:26 १:२६ होशे १:१०

27 इस्राएलयात कयाः यशैयां थथे धाःगु दु –

“इस्राएलया सन्तान
समुद्रय च्वंगु फि थें यक्व दुसां
ल्यंदुपि जक बचय् जुइ,

28 छाय्धाःसा प्रभुं याकनं हे
थ्व पृथ्वीयागु न्याय यानादी।”☆

29 यशैयां हानं थथे धयातःगु दु –

“दक्व शक्ति दुम्ह परमेश्वरं
झीत सन्तान ल्यंका मदीगु जूसा
सदोम व गमोरायागु गति जू थें तुं
झीगु नं अथे हे गति जुइगु खः।”☆

यह्दीतय्सं विश्वास मयाःगु

30 थज्याःगु खँय् झीसं छु धायेगु लय्? धर्मी जुइत मस्वःपिं यह्दीमखुपिं मनूत
इमिगु विश्वासं यानाः धर्मीं जुल।

31 व्यवस्था मानय् यानाः धर्मीं जुइत स्वयाः जूपिं यह्दीतय्सं धाःसा विश्वास
मयानाः व व्यवस्था मानय् याये मफयाः धर्मीं जुइ मफुत।

32 थथे जूगु छाय् लय्? विश्वास यानाः धर्मीं जुइत मस्वसे धर्मकर्म जक यानाः
धर्मीं जुइत स्वःगुलिं इपिं थथे जूगु खः। लुफि हाइगु ल्वहँतय् इपिं लुफि हा हे हात।

33 थथे नं च्वयातःगु दु –

“जिं सियोनय्
इमित लुफि हाकेत छगः ल्वहं
व क्वथलेत छगः ल्वहंधी
तयाच्चवना।

वय्क्ःयात विश्वास यानाजुइपिन्सं धाःसा
गुब्बसं लज्या चाय् माली मखु।”☆

10

1 यःपिं दाजुकिजापिं, यह्दीत नं बचय् जुइमा धयागु जिगु इच्छा दुगुलि परमेश्वरं इमित बचय् यानादीमा धकाः प्रार्थना यानाच्चवनागु खः।

2 परमेश्वरयागु नितिं इमिके जोश दु जिं थुकिया साक्षी बी। अयनं इमिसं बांलाक थुइका सयकातःगु मद्दु।

3 परमेश्वरयागु धार्मिकतायात थुइके सीके मफुगुलि इमिसं थःपिनिगु हे धार्मिकतायात दयकेत स्वल। अयज्जुगुलि इपिं परमेश्वरयागु धार्मिकताया अधीनय मच्चं।

4 ख्रीष्टं हे व्यवस्था पूर्वका दीगुलि वय्कःयात हे विश्वास यानाः मनूत धर्मी जुइ।

सकसितं दइगु उद्गार

5 मोशां थथे च्वया थकूगु दु – “व्यवस्था मानय् यानाः धर्मी जुइत स्वइमह मनू व्यवस्थां हे म्वाइ।”✠

6 ख्रीष्टयात विश्वास याना हे जक मनूत परमेश्वरया न्ह्यःने धर्मी ठहरय् जुइ। अयज्जुगुलि विश्वासं धर्मी ठहरय् जूपिं छिमिसं थथे मतिइ तये मते – “ख्रीष्टयात क्वत हयेत स्वर्गय् सु वनी?”

7 हानं “सीमह ख्रीष्टयात म्वाका हयेत पातालय् सु क्वहां वनी?” धकाः नं मतिइ तये मते।

8 परमेश्वरयागु वचन छिमिगु न्ह्यःने हे दु, छिमिगु म्हुतुइ व नुगलय् दु। जिमिसं न्यंकागु भिंगु खँ हे थ्व विश्वासयागु खः।✠

9 येशू हे प्रभु खः धकाः छिमिगु म्हुतुं धाल धाःसा व सीमह येशूयात परमेश्वरं म्वाकादीगु खः धकाः विश्वास याःसा छिमिगु उद्गार जुइ।

10 मनूतयसं नुगलानिसें विश्वास याःसा धर्मी जुइ, अले म्हुतुं स्वीकार याःसा उद्गार जुइ।

11 वय्कःयात विश्वास याइपिं सुनानं लज्या चाय् माली मखु धकाः न्हापां हे धर्मशास्त्रय् च्वयातःगु दु।✠

12 वय्कःयात विश्वास याइपिन्त यह्दीत व यह्दीमखुपिं धकाः पाकी मखु, छायाधाःसा वय्कः सकसियां प्रभु खः। अले थ्व हे प्रभुं वय्कःयागु नां काक्वसित यक्व आशिष बियादी।

13 थुकथं प्रभुयागु नां काइपिं सकसिगु उद्गार जुइ।✠

✠ 10:5 १०:५ लेवी १८:५

✠ 10:8 १०:६-८ व्य ३०:१२-१४

✠ 10:11 १०:११ यशै २८:१६

✠ 10:13 १०:१३ योए १:३२

14 अयसा वयकःयात विश्वास या हे मयाःपिन्सं गथे यानाः वयकःयागु नां काये फइ? अले वयकःयागु खँ गुबलें हे मन्यंपिन्सं गथे यानाः विश्वास याये फइ? सुनानं मधायकं इमिसं गथे यानाः न्यनी?

15 मछवयकं गथे यानाः मनूतयसं न्यंकः वनी? यशैयायागु सफुलिइ थथे च्वयातःगु दु –

“भिंगु खँ न्यंक वःपि मनूत
वयाच्चंगु गुलि बालाः।”☆

16 अयनं यहदीत फुक्कसिनं भिंगु खँय न्हायपं मब्युनि। थ्व हे खँ यशैयां नं च्वया थकल – “प्रभु, जिमिसं न्यंकागु खँय सुनां विश्वास याःगु दु?”☆

17 अथे जगुलि विश्वास न्यनाः दइ, अले न्यनेगु खँ ख्रीष्टयागु वचनं वइ।

18 अयनं जिं न्ह्यसः याये – छु इमित त्वहः तयेगु लँ दु ला? छु इमिसं गुबलें हे मन्यनि ला?

“धात्थे धायेगु खःसा
इमिगु सुचं संसार न्यंक
न्यनाच्चंगु दु।
अले संसारया कुंकुलामय् थ्यंक
ताये दयाच्चंगु दु।”☆

19 जिं हानं धाये – अयसा छु इस्राएलीतयसं थ्व खँ थुइके मफुत ला? थु ला थू, अयनं वास्ता मयाः, छायाःसा दकलय् न्हापां मोशां थथे धया थकल –

“जिं नं थः मखुपिं मनूतपाखें
इमिगु नुगः मुइके,
छगू मूर्ख जातियापाखें
इमित तं चायके।”☆

20 यशैयां अज्ज मग्यासे धाल –

“जितः माला मस्वःपिन्सं
जितः लुइकल।
जितः न्यनेकने मयाःपिन्त

☆ 10:15 १०:१५ यशै ५२:७

☆ 10:16 १०:१६ यशै ५३:१

☆ 10:18 १०:१८ भज १९:४

☆ 10:19 १०:१९ व्य ३२:३१

जिं हे जि सु खः धकाः
क्यनाबिया।”☆

21 इस्राएलीतयत् धाःसा परमेश्वरं थथे धाःगु दु –
“धयागु खँ मानय मजुइपिं
व मखुगु जक यानाजुइपिं
अतेरि मनूतयत् न्हिच्छि जिं ल्हाः
व्वयकाच्चनागु दु।”☆

11

इस्राएलीतयत् परमेश्वरं दया माया यानादीगु

1 अथे जूसा जिं धाये – परमेश्वरं वयकःया मनूतयत् त्वःतादी धुंकल ला? थथे मखु। जि थः हे नं अब्राहामया सन्तान, बेन्यामीन कुलयाम्ह छम्ह इस्राएली खः।☆

2 न्हापानिसें ल्ययातःपिं वयकःया मनूतयत् परमेश्वरं त्वःतादीगु मदुनि। एलियायागु खँ धर्मशास्त्रय् च्वयातःगु छिमिसं मस्यू ला? इस्राएलीतयत् मर्भिकाः एलियां परमेश्वरयात थथे बिन्ति यात –

3 “प्रभु, छिकपिनि अगमवत्तातयत् इमिसं स्याये धुंकल। बलि बियाः होम यायेगु छिकपिनिगु थाय् नं इमिसं थुनाछवये धुंकल। आः जि याकःचा हे जक ल्यंदनि, जितः नं इमिसं स्यायेत स्वयाच्चन।”☆

4 परमेश्वरं वयात छु लिसः बियादिल? “बालघःयात पुजा मयाइपिं न्हयद्रः मनूतयत् जिं ल्यंकातयागु दु।”☆

5 थौं तक नं परमेश्वरयागु दया मायां ल्ययादीपिं ल्यंदनिपिं गुलि गुलि इस्राएलीत दनि।

6 थथे दया मायां जूगु खः, ज्यां मखु, मखुसा दया माया दया माया हे जुइ मखु।

7 अले छु जुल लय? इस्राएलीतयसं छु कायेत कुतः यानाच्चंगु खः व काये मफुत। ल्यया तःपिन्सं धाःसा काये खन। मेपिन्सं परमेश्वरया खँ मन्यंसे अतेरि जुयाच्चन।

8 थ्व खँ थथे च्वयातःगु दु –

“परमेश्वरं इमित थुइके मफइगु

☆ 10:20 १०:२० यशै ६५:१ ☆ 10:21 १०:२१ यशै ६५:२ ☆ 11:1 ११:१ फिलि ३:५ ☆ 11:3 ११:३ १ राज १९:१०-१४ ☆ 11:4 ११:४ १ राज १९:१८

आत्मा,
 खनी मखुगु मिखा व ताइ मखुगु
 न्हायपं,
 थौ तक नं बियातःगु दु।”☆

9 दाऊद जुजुं नं थथे धया थकल –

“इमिगु भ्वजं इमित नाश यायेमा,
 इमिगु पवित्र भ्वय इमिगु निंति
 स्वःतिपाँय जुइमा।☆

10 इमिगु मिखा कां जुइमा,
 इमिगु दुगःक्वँय चाःतुइमा।”

11 अयजूगुलि जिं धाये – छु यहदीत नाश हे जुइक लुफि हानाः क्वदले
 धुंकल ला? अहं, अथे मखु, बरु इमिसं पाप याःगुलि इमित नुगः मुइके बीत
 यहदीमखुपिन्थाय मुक्ति वल।

12 थुकथं इमिसं पाप याःगुलि संसारयात यक्व हे भिन, अथे हे इपि स्यनाः
 यहदीमखुपिन्त यक्व आशिष दत धाःसा झन इस्त्राएलीत फुक्कसिनं विश्वास
 याइबलय गुलि जक भिनिगु जुइ।

यहदीमखुपिन्त मुक्ति

13 आः जिं यहदीमखुपिन्त धयाच्चना। जितः यहदीमखुपिनि प्रेरित यानाः
 इमिथाय छ्वयादीगुलि जिं थ्व ज्या यात तःधके।

14 थुकथं जिमि यहदी दाजुकिजापि मध्ये गुम्हं गुम्हयसित बचय यायेत जिं
 इमित नुगः मुइके बी।

15 छायाधाःसा इमिसं इन्कार यानाः हे ला संसारयापि मनूत परमेश्वर नाप मिलय
 जुल धाःसा, झन इमित थः हे नाल धाःसा सीपिन्त म्वाकेगु ति मग्यनी ला?

16 छायेहःगु छकुचा जक छवचुं पवित्र जूसां न्हायातःगु छवचुं छग्वारां पवित्र
 जुइ। अथे हे सिमाया हा पवित्र जूसा कचामचा नं पवित्र जुइ।

17 अथे हे गुलि कचात त्वधुला वं थें यहदीत नं गुम्हं गुम्हं परमेश्वरयात त्वःताः वन। छिपिं यहदीमखुपिं धाःसा जंगली जैतूनमा लिसे कचा स्वाःथें स्वाये धुंकल। उकिं जैतूनमायागु हा व रस छिमिसं नं काये खन।

18 अयजूगुलि छिपिं स्वाना तःपिं कचा जक जूगुलि तःधंछुइ मते। तःधंछुइत छिमिसं थ्व खँ लुमंकी- हायात नका तइपिं छिपिं मखु, बरु छिमित नका तइम्ह हा खः।

19 थथे “जिपिं स्वायेत ला कचा त्वधुला वंगु खः नि” धकाः छिमिसं धायेफु।

20 थ्व खँ ला सत्य खः। इमिसं विश्वास यानाच्चने मफुगुलि हे इपिं थथे त्वधुला वन, उकिं छिमिसं क्वातुक विश्वास यानाच्चने माल। अयजूगुलि छिपिं तःधंछुइ मते, बरु स्यनावनी ला धकाः ग्याना च्वँ।

21 परमेश्वरं अथें दयावःगु कचामचायात ला ल्यंका मदी धाःसा छिमित जक ल्यंकादी ला?

22 थुकथं यानादीम्ह परमेश्वर दया माया यानादीम्ह नं खः, अले सजाँय बियादीम्ह नं खः। स्यना वंपिन्त वय्कलं सजाँय बियादी, छिमित धाःसा दया माया यानादी। छिमिसं नं वय्कःयागु दया माया मयय्काः मच्च्वँसे वास्ता मयाःसा छिमित नं ध्यनाः छवइ।

23 इमिसं परमेश्वरयात हानं विश्वास यानाः लिहां वल धाःसा परमेश्वरं आः नं इमित स्वानादी फुनि।

24 छिपिं यहदीमखुपिं जंगली जैतून सिमाया कचा जुया नं पक्का जैतूनया सिमाय् स्वाये हल। यहदीत धाःसा पक्का जैतूनया कचात थें खः। अथे जूगुलि उकिया त्वधूगु कचात हानं व हे जैतून सिमाय् स्वायेत गुलि अःपुइगु जुइ।

परमेश्वरं सकसितं दया माया यानादी

25 दाजुकिजापिं, थ्व गुप्ति खँ थुइकाः छिपिं थथः हे बुद्धिमान जुइगु स्वये मते। गुप्ति खँ थ्व हे खः - गुबलय् तक यहदीमखुपिनिगु ल्याः गाइ मखु अबलय् तक यहदीतय्गु मिखा चाली मखु।

26 थुकथं फुक्क इस्पाएलीत बचय् जुइ। थथे च्वयातःगु दु -

“बचय् याइम्ह सियोनं झाइ,

अले वय्कलं याकूबया सन्तानयात

पापं छुतय् यानादी।✧

27 जिं इमिगु पाप मदय्का बीत

इपिनापं थथे बाचा चिने।”✧

28 छिमिसं भिंगु खँ न्यना: इपि परमेश्वरया शत्रु जुल। अयनं वय्कलं इमि तापा:बाज्यापिन्त ल्यया त:गुलि इपि वय्क:या य:पिं ख:।

29 छायाधा:सा वय्कलं ल्यय् धुंकूपिन्त त्व:तादी मख्, अले बियादी धुंकूग वरदान लित कयादी मख्।

30 न्हापा ला छिपिं नं छक: वय्क:यात मानय् मया:पिं ख:, आ: धा:सा वय्कलं छिमित दया माया यानादिल। इमिसं वय्क:यात मानय् मया:गुलि थथे जूगु ख:।

31 छिमित दया माया या:गुलि इपिं अतेरि जुयाच्चंगु ख:। छन्हु इमित नं दया माया यानादी तिनि।

32 वय्कलं फुक्क मनूतय्त हे दया माया यायेत इमित आज्ञा मानय् मयाइपिं यानादिल।

परमेश्वरयागु स्तुति

33 अहो! परमेश्वरया धन,
ज्ञान व बुद्धि गुलि त:धं!

वय्कलं यानादीगु न्याय
थुइकां थुइके मफु।

अले वय्क:यागु लँपु
सीकेत तसकं थाकु।✧

34 वय्क:यागु मन सीके
फुम्ह सु दु?

वय्क:यात सल्लाह
बी फुम्ह सु दु?✧

35 वय्कलं त्यासा पुले माय्क
वय्क:यात ब्यूम्ह हे सु दु?✧

36 फुक्कं परमेश्वरं सुष्टि
यानादीगु ख:।

वय्कलं हे याना:
अले वय्क:यात हे
फुक्क दुगु ख:।

✧ 11:27 ११:२७ यर ३१:३३-३४

✧ 11:33 ११:३३ यशै ५५:८

✧ 11:34 ११:३४ यशै ४०:१३

✧ 11:35 ११:३५ अयू ४१:११

वय्कःया हे सदां
जयजय जुयाच्चनेमा!✠
आमेन।

12

परमेश्वरया सेवा

1 यःपिं दाजुकिजापिं, थथे परमेश्वरयागु दया मायां यानाः वय्कःयात यय्क, पवित्र जुइक, छिमिगु जीवन वय्कःयात बलिकथं देछाया ब्यु। थथे यायेगु हे दुनुगलंनिसें सेवा यायेगु खः।

2 आवंनिसें थ्व संसारयापिं मनूतय्सं याना जू थें छिमिसं याना जुइ मते, बरु मनयात हीकाः न्हपिं मनूत जुयाच्चँ। थुकथं याना जूसा परमेश्वरयागु इच्छा छु खः, अले भिंगु, वय्कःयात यःगु, व छु खँ ठीक जू छिमिसं बांलाक सीके थुइके फइ।

3 परमेश्वरं जितः दया माया यानादीगुलि छिपिं फुक्कसिनं थःत तःधंम्ह धकाः मतिइ तथा जुइ मते धकाः जिं छिमित बिन्ति यानाच्चवना। परमेश्वरं छिमित बियादीगु विश्वास गपायधंगु खः उलि हे जक बांलाक बिचाः या।

4 छायाःसा मनूया म्ह छगू जूसां उकी यक्व म्हब्व दु। अले फुक्क म्हब्वतयगु ज्या छगू हे जुइ मखु।

5 थथे हे झीपिं नं यक्व दसां ख्रीष्टयागु म्हय् ला छम्ह हे जक खः। अले थीथी म्हब्वत छगू छगू यानाः मिलय् यानातःपिं खः।✠

6 परमेश्वरं झीत दया माया यानाः बियातःगु थीथी वरदानयात झीसं छयले माल। अगमवाणी कनेगु वरदान दःसा वं विश्वासं थ्व ज्या यायेमाः।

7 सेवा याइगु वरदान दःसा सेवा हे यायेमाः। स्यनेकने यायेगु वरदान दःसा स्यनेकने हे यायेमाः।

8 अतीं बीगु वरदान दःसा अतीं बीगु हे यायेमाः। बीगु वरदान दःसा दुनुगलंनिसें बीगु यायेमाः। नायः जुइगु वरदान दःसा बुद्धि पुरय् यानाः यायेमाः। कर्पिन्त दया माया यायेगु वरदान दःसा लयतायाः या।✠

धातर्थेम्ह विश्वासी यायेमाःगु खँ

9 दुनुगलंनिसें छिमिसं धातर्थेगु माया या। मभिंगु फुक्कं त्वःताछव। छु छु भिंगु खः व हे जक क्वान्तुक ज्वनाति।

10 छिपिं विश्वासी दाजुकिजापिं थःथवय् दुनुगलंनिसैं माया याना च्वँ। थःथवय् हनाबना तथा च्वँ।

11 यायेमाःगु ज्याय् अल्छी चाये मते। दुनुगलंनिसैं जोश दयकाः प्रभुयात सेवा याना च्वँ।

12 छिमिके तःधंगु आशा दुगुलि लयताया च्वँ। दुःखकष्ट जूसां सहयाना च्वँ। प्रार्थना यायेगु गुबलें त्वःते मते।

13 मगाःमचाःपिं दाजुकिजापिन्त ग्वाहालि या। छँय् पाहां वःपिन्त दुनुगलंनिसैं सेवा यायेगु या।

14 छिमित सास्ती ब्यूपिन्त सुवाः ब्यु, इमित सराः बी मते।*

15 लयतायत च्वपिं नाप छिपिं नं लयता। अले ख्वया च्वपिं नाप छिपिं नं ख्व।

16 छिपिं फुक्कं मिलय चले जुयाः च्वनेगु या। तःधंछु जुइ मते, थःत जक यःथें याना जुइ मते, बरु चिधंपिं नाप बुला जुइगु बानी त्वःते मते। गुबलें घमण्डी जुइ मते।*

17 मभिंगुया पलेसा मभिंगु हे याये मते, बरु फुक्क मनूतयत यइपुसे च्वंगु व भिंगु जक याना जु।

18 फुक्क मनूत नाप फयां फतलय् मिलय् जुयाच्वनेगु कुतः या।

19 यःपिं दाजुकिजापिं, छिपिं थःपिन्सं हे पलेसा कायेगु स्वये मते, बरु परमेश्वरया तच्चःगु तंमय् त्वःताब्यु। छायाःसा धर्मशास्त्रय् च्वयातःगु दु,

“बदला कायेगु जिगु ज्या खः,

जिं इमित सजाँय बी”

परमप्रभुं धयादी।*

20 धर्मशास्त्रय् च्वया तः थें याना च्वँ –

“थः शत्रु घांलाःसा

वयात नयेगु ब्यु,

अले पित्याःसा

वयात त्वने ब्यु।

थथे यात धाःसा

मछालाः वयागु ख्वाः

ह्याउँसे च्वनी।”*

* 12:14 १२:१४ मती ५:४४; लूक ६:२८

* 12:16 १२:१६ हितो ३:७

* 12:19 १२:१९ व्य

३२:३५ * 12:20 १२:२० हितो २५:२१-२२

21 मभिङ्गुलि छिमित त्याके बी मते, बरु छिमिसं भिङ्गु याना: मभिङ्गुयात त्याके फय्कि।

13

सरकारं धा:थें च्वनेमा:

तीत ३:१-११; १ पत्र २:१३-१७

1 फुक्क मनूत सरकारया अधीनय् च्वनेमा:। परमेश्वरं थुमित अधिकार बियात:गु ख:; मेपिन्सं बियात:गु मखु। थौकन्हय् थुपिं हाकिमतयत् नं परमेश्वरं हे ल्ययादीगु ख:।

2 अय्जुगुलि सुनां अधिकार दुपिं मनूतयगु खँ मानय् याइ मखु, परमेश्वरयात मानय् मया:गु ति ग्यनी। वयक्लं इमित सजाँय बियादी।

3 हाकिमत खना: मभिपिं मनूत जक गयाइ। भिपिं मनूत गयाइ मखु। छिपिं हाकिमत खना: मग्यासे च्वने मास्ति व: ला? अय्सा भिङ्गु भिङ्गु ज्या जक याना च्वँ, अले हाकिमतयसं छिमित स्याबास बी।

4 इपिं छिमित भिङ्गु यायेत तयात:पिं परमेश्वरया सेवकत ख:। अय्न् छिमिसं मभिङ्गु ज्या याना जुल धा:सा इपिं खना: छिपिं ग्याये माली, छायाधा:सा सुनानं म्वाय्कं तरवार घाना वइ मखु। इपिं मभिङ्गु ज्याखँ यानाजुइपिन्त सजाँय बीत तयात:पिं परमेश्वरया सेवकत ख:।

5 थथे जूगुलि परमेश्वरया तंपाखें जक बचय् जुइत मखु, थ:गु विवेकयागु निंति नं हाकिमतयसं धा:थें च्वनेमा:।

6 उकिं हे ला ख: नि, छिमिसं कर पुलेमा:गु। हाकिमत फुक्कं थज्या:गु हे ज्या यायेत तयात:पिं परमेश्वरया सेवकत ख:।

7 उकिं इमित पुलेमा:गु फुक्कं पुलाब्यु, कर पुलेमा:पिन्त कर पु, भन्सार पुलेमा:पिन्त भन्सार पु। अथे हे मानय् याये मा:पिन्त मानय् या।*

छम्हं मेम्हयसित यायेमा:गु माया

8 थ:थवय् माया यायेगु बाहेक सुयाकें छुं त्याये काये मते। मेपिन्त माया याइपिन्सं व्यवस्था पूर्वकी।

9 व्यवस्थाय् थुकथं धयात:गु दु – व्यभिचार याये मते, सुयातं स्याये मते, खुयाकाये मते, लोभ याये मते। अले मेगु आज्ञा फुक्कं थुकी दुने हे ला: –

“थ: ज:लाख:लापिन्त थ:त थें

* 13:7 १३:६-७ मती २२:२१; मर्क १२:१७; लूक २०:२५

हे माया या।”☆

10 मायां मेपिन्त स्यंकी मखु, उकिं माया यायेगु हे व्यवस्था पूर्वकेगु खः।

11 छिमिसं थ्व संसारय् गज्याःगु ई वयाच्च्वंगु दु बांलाक बिचाः याना च्वँ, घनेगु त्वःताः दनेगु ई वये धुंकल। उद्द्वार कायेगु ई न्हापा झीसं विश्वास यानाबलय् स्वयाः नं न्ह्यःने थ्यने धुंकल।

12 चा फुइन, आः न्हि वइन। उकिं खिउँबलय् यायेगु ज्या त्वःताः जःयागु ल्वाभः ज्वनाः तयार जु।

13 थुकथं झीगु चालचलन जलय् च्वंपिनिगु थें याये माल, उकिं झीसं मोजमज्जा यायेगु, अय्लाः त्वना जुइगु, व्यभिचार यायेगु, लाः लाः थें सना जुइगु, ल्वापु यायेगु, नुगः मुइकेगु त्वःताछवये माल।

14 थथे मयासैं बरु न्हागु याःसां प्रभु येशू ख्रीष्टयात ययक जक याना च्वँ। थः यःथें जक याना जुइ मते।

14

दाजुकिजापिन्त कुंखिने मते

1 विश्वास बमलाःनिम्ह मनूयात संगतिइ लसकुस या, वयागु खँयात कयाः जवाःसवाः याये मते।

2 विश्वास बल्लाःम्ह मनुखं थःत यःगु न्हागुं नइ, विश्वास बमलाःम्ह मनुखं वाउँचा जक नइ।

3 अथे न्हागुं नइम्हयसिनं मनइम्हयसित क्वह्यांके मते, अथे हे मनइम्हयसिनं नं नइम्हयसित कुंखिने मते। छायाःसा परमेश्वरं इमित थः मनु दयकादीगु खः।

4 मेपिनि च्यःयात न्याय याइम्ह छ सु खः? वं याःगु ज्या बांलाः बांमलाः धकाः वया मालिकं हे न्याय याइ। वं बांलाःगु ज्या याये फइ, छायाःसा वया मालिकं वयात लिधंसा बी फु।

5 गुम्ह गुम्हयसिनं मेमेगु दिनयात स्वयाः छन्हयात तःधं धकाः मानय् याइ। गुम्ह गुम्हयसिनं फुक्क दिनयात उत्थें खः धकाः मानय् याइ। फुक्कं थथःम्हं विश्वास यानागु खँय् पक्का जुयाच्वनेमाः।

☆ 13:9 १३:९ प्रस २०:१३-१५,१७; व्य ५:१७-१९; लेवी १९:१८

6 मेमेगु दि स्वयाः छन्हुयात तःधंकीम्हं प्रभुया निति हे तःधंकी। सुनां नयेनी याइ वं प्रभुया निति नइ, छायाधाःसा वं परमेश्वरयात सुभाय् बियाः नइ। अथे हे मनइम्हय्सिनं प्रभुया निति नइ मखु, अयन् वं नं परमेश्वरयात सुभाय् बी।☆

7 झीपिं सुं नं थःगु निति म्वानाच्चनागु मखु। अले सुं नं थःगु निति सी मखु।

8 झीपिं म्वाना च्वंसा प्रभुयागु निति हे म्वानाच्चनेगु खः। झीपिं सीसां प्रभुयागु निति हे सीगु खः। अयज्गुलि सीसां म्वाःसां झीपिं प्रभुया मनूत खः।

9 छायाधाःसा म्वाःपिनि नं सीपिनि नं प्रभु जुइत हे ख्रीष्ट सिनाः हानं म्वानादिल।

10 अयज्गुलि छिपिं वाउँचा जक नइपिन्सं थः दाजुकिजापिन्त छाया कुंखिनेगु? छिपिं न्हागुं नइपिन्सं थः दाजुकिजापिन्त छाया हेस्यानागु? न्यँ, न्याय यानादीबलय् झीपिं फुक्कं परमेश्वरया न्ह्यःने च्वने मानि।☆

11 धर्मशास्त्रय् थथे च्वयातःगु दु –

“प्रभुं धयादिल –

जिं धात्थें धाये –

फुक्क मनूतय्सं

जिगु न्ह्यःने पुलिं चुइमाः।

अले हानं फुक्कसिनं

जि परमेश्वर खः धकाः धायेमाः।”☆

12 थुकथं झीपिं छम्ह छम्हय्सिनं थथःगु ल्याःचाः परमेश्वरयात बीमाः।

नयेत्वनेगुलिइ सुयातं कुंखिने मते।

13 अयज्गुलि झीसं दाजुकिजापिन्त कुंखिनेगु त्वःताछवये माल, अले इमित क्वथलेगु व पापय लाकेगु ज्या गुब्सं याये मखु धकाः झीसं पक्का याये नु।

14 प्रभु येशूयात विश्वास यानागुलि छुं नं नसा थः हे अशुद्ध धयागु मदु धकाः जिं बांलाक थुइकाः सीका तयागु दु। सुनानं थ्व अशुद्ध खः धकाः बिचाः याःसा वयात व अशुद्ध हे जुइ।

15 छिमिगु नयेत्वनेगुलि यानाः दाजुकिजापिनि नुगलय् स्यात धाःसा छिमिसं इमित अज्जं माया याये मफुनि। नयेत्वनेगुलि छिमि दाजुकिजापिन्त स्यंके मते, छायाधाःसा इमिगु निति हे ख्रीष्ट सिनादिल।

16 अयज्गुलि छिमित भिंगु छु खः उकियात कर्पिन्सं मभिं धाय्के मते।

17 परमेश्वरयागु राज्य नयेगु व त्वनेगु जक मखु, बरु पवित्र आत्मां बियादीगु धार्मिकता, शान्ति व आनन्द खः।

18 थुकथं ख्रीष्टयागु सेवा यानाजुइमह मनूयात परमेश्वरं स्याबास बियादी, अले वं थथे याना जूगु खनाः मन्तयसं नं थ्व भिंमह मनू खः धकाः धाइ।

19 उकिं छु याःसा शान्ति जुइ, अले फुक्क मिलय् जुयाः सकसिगुं भिं जुइगु खः, व जक यानाजुइगु स्वये माल।

20 छिमिगु नयेत्वनेगुलि परमेश्वरयागु ज्यायात स्यंके मते। धात्थे धायेगु खःसा फुक्क नसा शुद्ध जू, अयनं सुनानं नयेत्वनेगुलि मेमह विश्वासीयात स्यंकल धाःसा वं द्रुकूगु जुइ।

21 धात्थे हे – ला मनयेगु, दाखमघ मत्वनेगु व थः दाजुकिजापिं लुफि हाइगु छुं नं मयायेगु हे बांलाः।

22 थ्व खँय् छिमिसं छु बिचाः यानाः परमेश्वर व छंगु दथुइ जक ति। थःमहं भिं तायकूगु खँय् संका मयाइमह मनू हे धन्यमह खः।

23 सुनानं संका यानाः नल धाःसा परमेश्वरं वयात दोषी यानादी, छायाधाःसा वं विश्वास यानाः मनःगु जुइ। विश्वासकथं मयाःगु न्ह्यागु पाप खः।

15

मेपिन्त यायेमाःगु वास्ता

1 थथे झी बल्लाःपिन्सं बमलाःपिन्त विश्वासी जुयाः म्वानाच्चनेत ग्वाहालि यायेमाः, झीत जक यःथे याना जुइ मज्यु।

2 झी फुक्कसिनं थः जःलाखःलापिन्त भिं जुइगु मतिइ तयेमाः, अले जक इमिगु विश्वास बल्लानावइ।

3 मुक्ति बीमह ख्रीष्टं नं थःत यःथे याना मजगु खँ धर्मशास्त्रय् थुकथं च्वयातःगु दु – “छितः क्वह्यंकिपिन्सं जितः नं क्वह्यंकाहःगु दु।”☆

4 न्हापा न्हापा जगु च्वयातःगु फुक्क खँ झीत स्यनेत खः। धर्मशास्त्रय् च्वयातःगुपाखे ग्वाहालि कयाः सह यानाच्चन धाःसा झीत आशा दइ।

5 सह याये फय्कादीमह अले ग्वाहालि बियादीमह परमेश्वरं छिपिं सकसिनं छप्पे जुयाः येशू ख्रीष्टयागु लँपुइ वने फय्कादीमा।

6 थथे छिपिं फुक्कं छप्पे जुयाः छगू हे सलं झी प्रभु येशू ख्रीष्टया बाः परमेश्वरयात जयजय याये फयेमा।

7 परमेश्वरयात जयजय यायेमा धकाः ख्रीष्टं छिमित नालादीं थें तुं छिमिसं नं बल्लाःपिं व बमलाःपिं दाजुकिजापिन्त नाला कायेगु या।

8 जिं छिमित धाये – परमेश्वर भरोसा याये बहःम्ह खः धकाः सीके बीत ख्रीष्ट हे यहदीतय् च्यः थें जुयादिल। इमि तापाःबाज्यापिन्त बचं बियादीगुलि

9 यहदीमखुपिन्सं नं परमेश्वरं दया माया यानादीगुलि वय्कःयात जयजय यायेमा धकाः ख्रीष्ट झायादीगु खः। धर्मशास्त्रय् नं थथे च्वयातःगु दु –

“यहदीमखुपिं दुथाय् नं
जिं छितः जयजय याये
छिगु ना कयाः भजन हाले।”☆

10 धर्मशास्त्रय् नं थथे च्वयातःगु दु –

“हे जातित!
वय्कःया मनूत नाप
लय्ताया च्वँ।”☆

11 हानं थथे च्वयातःगु दु –

फुक्क यहदीमखुपिन्सं नं
प्रभुयात जयजय या।
फुक्क जात जातियापिन्सं नं
म्ये हालाः
वय्कःया प्रशंसा या!☆

12 अले यशैयां नं थथे धाःगु दु –

“यिशैया सन्तान दइ,
वं यहदीमखुपिन्त राज्य याइ।
अले इमिसं वय्कःयाके हे आशा तइ।”☆

13 छिमिसं विश्वास याःगुलि भरोसा याये बहःम्ह परमेश्वरं छिमिगु नुगलय् आनन्द व शान्ति जायकादीमा। थुकथं पवित्र आत्मायागु शक्तिं छिमिगु आशा व भरोसा अप्वः दयावनेमा।

☆ 15:9 १५:९ २ शमू २२:५०; भज १८:४९
११७:९ ☆ 15:12 १५:१२ यशै ११:१०

☆ 15:10 १५:१० व्य ३२:४३

☆ 15:11 १५:११ भज

यह्दीमखुपिन्थाय् पावलं याःगु ज्या

14 यःपि दाजुकिजापि, छिपि तसकं भिपि अले बुद्धिं जाःपि जूगुलि छम्हं मेम्हयसित स्यनेकने याये फुगुलि जि लुधं।

15 परमेश्वरं जितः दया माया यानाः अधिकार बियादीगुलि छिमित हानं छुं मू खँ लुमंकाबीत मग्यासे थथे च्वयाच्चवना।

16 जितः यह्दीमखुपिन्त परमेश्वरयागु भिंगु खँ कनेत ख्रीष्ट येश्याम्ह च्यः यानादीगुलि पुजाहारीं छाःथें जिं नं परमेश्वरयात यःगु पवित्र आत्मां शुद्ध यानातःपि यह्दीमखुपिन्त छाये हयागु दु।

17 थथे येशू ख्रीष्टलिसे परमेश्वरया ज्या याये दुगुलि जिगु छ्यं धस्वाः।

18 ख्रीष्टं जिगुपाखें यह्दीमखुपिन्त परमेश्वरयात मानय् याकेत यानादीगु वचन व ज्याखँ बाहेक मेगु खँ ल्हायेगु आँट जिं मयाना।

19 जिं अजू चायापुगु चिं व ज्या नं याना, पवित्र आत्मायागु शक्तिं यरुशलेमंनिसें इल्लुरिकन तक फुक्कभनं ख्रीष्टयागु भिंगु खँ न्यंकागु दु।

20 ख्रीष्टयागु नां मस्युपिन्थाय् वनाः ख्रीष्टयागु भिंगु खँ न्यंकेगु जिगु इच्छा खः। मेपिन्सं जग स्वना तये धुंकूथाय् वनाः छँ दनेथें मेपिन्सं न्यंका तये धुंकूथाय् वनाः हानं न्यंके मास्ति मवः।

21 थथे च्वयातःगु नं दु —

“वय्कःयागु खँ गुबलें हे मन्यनिपिन्सं

वय्कःयात खनी।

वय्कःयागु खँ गुबलें हे मताःनिपिन्सं

वय्कःयागु खँ थुइकी।”☆

पावलया रोमय् वनेगु ग्वसाः

22 थथे जुयाच्चंगुलि तःकः मछि जि छिमिथाय् वये मास्ति वःसां वये मफुगु खः।☆

23 आः थन फुक्कभनं ज्या याये धुंगुलि, अले यक्व दँ न्ह्यवंनिसें जि छिमिथाय् वये मास्ति वय्का च्वनागुलि

24 स्पेनय् वनेत वयेबलय् लँपु लाकाः छिमित नापलाः वये। छन्हु निन्हु जि छिमिथाय् हे च्वनेगु इच्छा दु, नापं स्पेनय् वनेत जितः छिमिसं छुं भचा ग्वाहालि बी धकाः जिं आशा यानागु दु।

25 आः धाःसा जि यरूशलेमय् विश्वासीतयत् ग्वाहालि यायेत वनेत्यना।

26 यरूशलेमय् च्वंपि चीमिपि विश्वासीतयत् ग्वाहालि बीत माकेडोनियाय् व अखैयाय् च्वंपि मण्डलीयापिन्सं लयत्तातां भेटी बिल।☆

27 इमिसं धाये म्वाय्क थःपिन्सं हे भेटी ब्यगु खः। इमिसं थथे ग्वाहालि याये हे माः, छायाधाःसा यहदीतय्पाखें हे यहदीमखुपिन्सं परमेश्वरया आशिष काये खंगु खः। अथे हे यहदीमखुपिन्सं नं माल कि यहदीतयत् ग्वाहालि यायेमाः।☆

28 थ्व ज्या सिधय्काः जिं कयाः हयागु भेटी लःल्हाना बीधुंकाः छिमित नाप लानाः जि स्पेनय् वने।

29 जि छिमिथाय् वयेबलय् ख्रीष्टं बियादीगु यक्व आशिष नं ज्वनाः वये दइ धकाः जिं स्यु।

30 यःपिं दाजुकिजापिं, झी प्रभु येशू ख्रीष्टया नामं व पवित्र आत्मां बियादीगु मायां जिगु निति जिलिसें मदिक्क परमेश्वरयात प्रार्थना यानाब्यु धकाः बिन्ति यानाच्वना।

31 यहदीयाय् च्वंपि विश्वास मयाःपिं मन्तयपाखें जि बचय् जुइमा धकाः व यरूशलेमय् जिगु सेवा अन च्वंपि विश्वासीतयत् ययेमा धकाः परमेश्वरयात प्रार्थना या।

32 अले परमेश्वरयागु इच्छा दुसा जि लयल्यतातां छिमिथाय् वये, अले छिपिनाप आनन्दं च्वने।

33 शान्ति बियादीम्ह परमेश्वर छिपिनाप दयेमा। आमेन।

16

पावलं ज्वजलपा न्यंका छ्वःगु

1 किंकियाय् च्वंगु मण्डलीइ सेवा याइम्ह फिबी झी केहें खः।

2 प्रभुयागु सेवा यानाच्वंपिन्त लसकुस याये थें वयात नं लसकुस या। यक्व विश्वासीतयत् व जितः नं ग्वाहालि बीम्ह जूगुलि वयात न्हागु हे माःसां ग्वाहालि या।

3 जिनापं ख्रीष्ट येशूयागु ज्या याइपि प्रिस्का व अक्विलासपिन्त ज्वजलपा दु धकाः न्यंकाब्यु।☆

4 जितः बचय् यायेत इपिं थःपिं हे झन्दलय् सीत्यंगु खः। जिं जक मखु, फुक्क जात जातियापिं मन्त दुगु मण्डलीं नं इमित सुवाः बियाच्वंगु दु।

5 इमिगु छेंय् मुनीगु मण्डलीयात नं ज्वजलपा दु।

जितः यःम्ह अले एशियाय् दकलय् न्हापां ख्रीष्टयात विश्वास यानादीम्ह इपेनितसयात जिगु ज्वजलपा दु धकाः न्यंकाब्यु।

6 छिमिगु निंति ज्यान पानाः यक्व ज्या याइम्ह मरियमयात ज्वजलपा दु धकाः न्यंकाब्यु।

7 यह्दी दाजुकिजापि, अले जि नाप इयालखानय् च्वनेधुंकूपि एन्ड्रोनिकस व युनियसयात ज्वजलपा दु धकाः न्यंकाब्यु। इपि प्रेरितत थें नांजाःपि खः। इपि जि स्वयाः नं न्हापालाक ख्रीष्टयात विश्वास यानाच्चंपि मनूत खः।

8 प्रभुयात विश्वास यानाच्चंम्ह जितः यःम्ह एम्प्लीआतसयात ज्वजलपा दु धकाः न्यंकाब्यु।

9 इी नाप नापं ख्रीष्टयागु ज्या यानाच्चंम्ह उर्बानस व जितः यःम्ह स्ताखुसयात ज्वजलपा दु धकाः न्यंकाब्यु।

10 ख्रीष्टयागु ज्या बांलाक याइम्ह धकाः म्हसीका तये धुंकूम्ह अपेल्लेसयात ज्वजलपा दु धकाः न्यंकाब्यु। अरिस्तोबुलसया जहानपिन्त नं ज्वजलपा दु धकाः न्यंकाब्यु।

11 जिम्ह यह्दी किजा हेरोदियनयात ज्वजलपा दु धकाः न्यंकाब्यु। प्रभुयात विश्वास यानाच्चंपि नर्किससया जहानपिन्त नं ज्वजलपा दु धकाः न्यंकाब्यु।

12 प्रभुयागु ज्या यानाजुइपि केहेंपि न्नुफेना व त्रोफोसायात ज्वजलपा दु धकाः न्यंकाब्यु। दुःखकष्ट सियाः प्रभुयागु ज्या याना जूम्ह जितः यःम्ह परसीसयात ज्वजलपा दु धकाः न्यंकाब्यु।

13 प्रभुं ल्ययातःम्ह रुफसयात व वया मांयात ज्वजलपा दु धकाः न्यंकाब्यु। वया मां जिम्ह मां थें हे खः।✠

14 असिंक्रितस, फ्लेगन, हर्मस, पत्रोबास, हर्मास व इपि नाप दुपि विश्वासी दाजुकिजापिन्त ज्वजलपा दु धकाः न्यंकाब्यु।

15 फिलोलोगस, युलिया, नेरियस व वया केहें, अले ओलिम्पास, व इपि नाप संगति याइपि फुक्क विश्वासीतयूत नं ज्वजलपा दु धकाः न्यंकाब्यु।

16 दाजुकिजापि सकसितं थःथवय् यच्चु नुगलं माया यानाः ज्वजलपा यायेगु या। ख्रीष्टयागु यक्व मण्डलीपाखें छिमित ज्वजलपा धयाहःगु दु।

दक्वसिबय् लिपायागु सल्लाह।

17 यःपि दाजुकिजापि, छिमित स्यनागु शिक्षा नाप पायुछि मजुइक अःखतं ल्वापु याकेत व मनूतयगु विश्वास स्यंकेत स्वइपि नाप होश यानाच्वँ। इपिपाखें तापाक च्वँ।

18 थज्याःपि मनूतयसं झी प्रभु येशू ख्रीष्टयागु सेवा याइ मखु, बरु थथःगु प्वाःया निरिति सेवा याना जुइ। म्हुतुं घ्यः थें नाइसे च्वंक खँ ल्हानाः स्वजासिजापिन्त ध्वं लाइ।

19 छिमिसं परमेश्वरयात मानय यानाच्वंगु दु धकाः फुक्कभनं बयबय जगुलि जि छिपि खनाः तसकं हे लयतायाच्वना। छिमिसं मभिगुली वास्ता मयासें छुं हे मस्यूपि थें जुयाः भिगुली जक बांलाक मन तथाः बुद्धिमान जुया च्वंसा जि तसकं लयताये।

20 थुकथं याना जूसा शान्ति बियादीम्ह परमेश्वरं शैतानयात छिमिगु तुति याकनं हे न्हुइके बी। झी प्रभु येशू ख्रीष्टयागु दया माया छिमिके दयाच्वनेमा।

21 जि नाप नाप प्रभुयागु ज्या यानाच्वंम्ह तिमोथी, जिमि यहदी किजापि लुकियस, यासोन व सोसिपात्रोसपिन्सं छिमित ज्वजलपा धयाहःगु दु।*

22 थ्व पौ च्वःम्ह जि तर्तियसयागु नं प्रभुयात विश्वास यानाच्वंपिं छिमित ज्वजलपा धयाहःगु दु।

23 मण्डलीयात व जितः थःगु पाहां ब्वंम्ह गायसं छिमित ज्वजलपा धयाहःगु दु। शहरयाम्ह दांभरिं इरास्तस व झीम्ह विश्वासी किजा क्वार्टसं छिमित ज्वजलपा धयाहःगु दु।*

24 [झी प्रभु येशू ख्रीष्टयागु दया माया छिपिं सकसिकें दयाच्वनेमा। आमेन।]

25 परमेश्वरयात तःधंकि, छायाधाःसा छिमिगु विश्वास बल्लाकादी फुम्ह परमेश्वर हे खः। न्हापांनिसें गुप्त तथातःगु येशू ख्रीष्टयागु भिंगु खँ आः सकसितं सीके बियादीगु दु।

26 थ्व हे गुप्त खँ आः फुक्क मनूतयत सीके बीत अगमवत्तातयसं च्वया थकूगु दु। सदां दयाच्वनीम्ह परमेश्वरं फुक्क जात जातियापिन्त सीके बीत, अले विश्वास यानाः वयकःयात मानय यायेत थ्व भिंगु खँ बयबय यायेमाः धकाः आज्ञा बियादीगु दु।

27 छम्ह हे जक बुद्धिमान परमेश्वरयात येशू ख्रीष्टयापाखें सदां जयजय जुयाच्वनेमा। आमेन।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7